

Dill' wen dill' kob daa bzej Juanna'

Beena' nak Xtill' Chioza' golje' goke' to ben'

¹ Ba zoakzə beena' le Xtill' Chios ka wxe wzil yog'lolte dii de. ² Len' ba zoalene' Chioza', na' lekzen' Chioza', ³ na' dezdz nechte ba zoalenkze' Chioza'. ⁴ Len' bene' yog'te dii de, na' biga de to dii bi bene'. ⁵ Len' cho'e yel' mban, na' nake' beeni' che ben' yell-lioni. ⁶ Na' beeni' che'na' chzeeni'n yell-lioni gani nak shgasj shchol ni che dii mala', na' yel chola' bi bizoyin yisolan beeni'na'.

⁷ Wzoa to ben' bsel' Chioza' wlie' Juan. ⁸ Juanna' bidyee dill' che beena' nsa' beeni'na' kwenche yog' ben' gonlilall'gake'ne'. ⁹ Aga Juanna'yen'nan nsee beeni'na', san to bidtixje'ze' che beena' nsa' beeni'nan'. ¹⁰ Beena' nsa' beeni'na' daa nak dowalj daa wzeeni'n lao yog'lol ben', ba zee yell-lioni.

¹¹ Na' beena' nsa' beeni'na' bidsoe' yell-lioni, na' la'kzi le' bxē bsile' yell-lioni, ben'ka' lle' law-inna' aga gokbe'gakile' non nake'. ¹² Blline' ladzh ben'ka' nak ben' yell che', na' legake' bi blebgake'ne'. ¹³ Per yog' ben'ka' blebgake'ne' na' benlilall'gake'ne', bene' legake' xiin' Chios. ¹⁴ Na' aga daa nakgake' ben' de beli chenan, wa daa cheeni ben' soalen ljwellen', ni aga daa cheeni ben' soa xiinen', san daa benlilall'gake'nen' gokgake' xiin' Chios.

¹⁵ Na' beena' le Xtill' Chios golje' goke' to ben' de beli chen na' wzoe' ladjnto'ni. Na' ble'into'ne'

nake' ben' zakii nlleb daa nake' Xiiñ tlish' tyaj Xacho Chioza', na' nake' ben' lall'do' xen inlleb na' bli'e do ka nak dii lina'. ¹⁵ Na' Juanna' bi'e dill' che' wne':

—Che beenin bzajniid' le' kana' wnia': “Beena' zi' za' nake' ben' zak'chi aga ka nad', la' ba zoakze' kana' zi' soa' nad'.”

¹⁶ Daa nake' ben' wen inlleb na' daa chakchgaile' cho', dii zan dii wenka' ba bene' che yog'cho. ¹⁷ Dii Moiséza' bzajniile' cho' diika' bllia Chioza' bia' goncho; per Jesucrístona' bli'e yel' chiyesh'lalli che Chioza' len dii li che'na'. ¹⁸ Ni to konon' ile'i Chioza', per Xiiñe'na' nak tlish' tyaj, beena' zoalene'ne', len' bidliile' cho' ka nake'.

Juanna', beena' bchoa ben' nisa', bi'e xtill' Jesucristona'

(Mt. 3:11-12; Mr. 1:7-8; Lc. 3:15-17)

¹⁹ Ben' wñabia' che ben' Israelka' lle' Jerusalénn'a' bsel'gake' to chop bñoz na' sto chop ben'ka' nak xiñ dia che dii Levína' kwenche janabgakile' Juanna' non nake'. ²⁰ Na' bi bkwashée non nake', san golle' legake':

—Aga nadaan Crítona', beena' chbezcho wsel' Chioza'.

²¹ Na'ch wizñabgakile'ne':

—¿Norakzan nako' shka'? ¿Alin' Elíaza', beena' wdixjee daa goll Chioza'ne' kani'yí?

Na' Juanna' chi'e:

—Aga le' nad'.

Na'ch chize'gake'ne':

—¿Alin' beena' ba llia bia' yid kwenche chixji'e daa che' Chioza'ne', shka'?

Na' che' Juanna':

—Akza le' nad'.

22 Na'ch che'gake'ne':

—¿Norakzə li', shka'? Cheeninto' inezinto'
kwenche lljayellnto' ben'ka' bsel'' neto' non nako'.
¿Bi ka ino' che kwino'?

23 Na'ch che' Juanna' legake':

—Dii Isaíaza', beena' wdixjee daa goll Chioza'ne'
kani'yi, dill' chan' bi'e kana' wne': "To ben' gosyee
zillj latja' gana' bibi chashj chleb, na' ine': Li se
kwas kwenche wzenagle che Xanchona' kat' zee."

24 Na' ben'ka' bsel'' fariseoka' 25 wnabgakile'ne':

—¿Berache chchoazo' ben' nis shi aga lin'
Críston'a', ni Elíaza', ni beena' llia bia' wsel'' Chioza'
kwenche chixji'e daa chi'ene'?

26 Na' che' Juanna' legake':

—Nad' chchoa' ben' nis, per ladjleni zoa to ben'
bi nombia'le, 27 na' len' zi' wli'lawe'. Na' nad' ni bi
zakaa gak' xmose' kwenche galj' la'ch' xele'na'.

28 Yog' diiki gok gana' le Betania, daa llia shlaa
yao Jordanna', gana' bchoa Juanna' ben' nisa'.

*Jesúza', beena' bsel'' Chioza', zaklebile' xil'do'na'
chitgake'*

29 Na' betiyo ble'i Juanna' Jesúza' zeje' kwite'na',
na' chi'e:

—Li wwia, beenin bsel'' Chioza' na' zaklebile'
xil'do'na' chitcho, la' len' yikwase' saaxyu che ben'
yell-lioni. 30 Na' xtill' beenin bi'a kana' wnia': "Zi'
za' to ben' zak'chi ka nad', na' ba zoakz beeni kana'
zi' soa'." 31 Ni nad' bi wnezid' no xtiliin bi'a, per
kwenche gombia' ben' Israelki le', bidchoa' ben'
nis.

32 Na' Juanna' wizne':

—Ble'id' Espíritu che Chioza' betje'yabana' nake'ka to palom na' jsoalene' le'. ³³ La' ni nad' bi wñezid' no xtiliin bi'a, per Chioza', beena' bsel' nad' chchoa' ben' nis, wne': “Ile'ilo' yetj Espíritu cha'na' lljsoalene' beena' wlej', na' len' gone' ka yidsoa Espíritu Sántona' loo yichjlall'do' ben'.” ³⁴ Ba ble'id' gok ka wna Chioza' nad', na' naa nia' le' beenin Xiiñ Chioza'.

Ben'ka' bengake' Jesúza' txeñ dii nech

³⁵ Na' betiyo Juanna' zelene' chop ben'ka' nakgake'ne' txeñ. ³⁶ Na' ka ble'ile' chda Jesúza' na', na'ch chi'e:

—Li wwia, beenin bsel' Chioza' na' zaklebile' xil'do'na' chitcho kwenche chiyakxen saaxyä chechoka'.

³⁷ Na' chop ben'ka' nak Juanna' txeñ, ka bengakile' wna Juanna' ka', na' janogake' Jesúza'. ³⁸ Na'ch ka biyeçhj Jesúza', ble'ile' zjanogake'ne' na' chi'e legake':

—¿Bin cheenile?

Na' che'gake'ne':

—Rabí, ¿garan zo'?

(Na' Rabí zejin: ben' chli' chsedi ben'). ³⁹ Na' che' Jesúza':

—Li da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana', la' ka do chida tapan billinlengake'ne' gana' zoe'.

⁴⁰ Na' beena' le Andrés, ben' bish' Simón Pédrona', len sto ben' yoblə gokgake' chopə janogake' Jesúza' ka bengakile' daa wna Juanna' che'. ⁴¹ Na' Andréza' lii jadiltie' ben' bishee Simónna', na' chi'ene':

—Ba billelinto' beena' nak Mesíaza'—. Na' Mesías zejin Cristo, beena' chbezgake' wsel' Chioza' kwenche inabi'e.

⁴² Na'ch Andréza' b̄chi'e Simónna' gana' zoa Jesúza', na' ka ble'i Jesúza'ne', chi'ene':

—Lin' Simón, xiin Jonáza', na' naa yilio' Cefas—. Na' Cefas zejin Pedro.

Jesúza' golle' Felípena' len Natanaela' gakgake'ne'
txen

⁴³ Na' betiyo ka zi' yiay Jesúza' gana' mbaní Galileana', billague' Felípena' na' chi'ene':

—Da dino nad'.

⁴⁴ Felípena' nake' ben' yell Betsaida, gana' nak lall Andréza' na' Pédrona'. ⁴⁵ Na'ch jadilj Felípena' Natanaela' na' chi'ene':

—Ba billelinto' beena' bzej dii Moiséza' xtilleena' lee libr che leya'. Na' lekzka' chen' bzej dii ben'ka' wdixjee daa goll Chioza' legake' kani'yi. Len' Jesúza', ben' Nazareta', xiin Joséna'.

⁴⁶ Na' Natanaela' chi'ene':

—¿Aka Nazareta' ichej to ben' zakii?

Na' Felípena' golle'ne':

—Dakachi kwenche gakbe'ilo'.

⁴⁷ Na' ka ble'i Jesúza' zej Natanaela' gana' zie', golle':

—Ni za' to ben' nak dowalj ben' Israel, to ben' bi nak ben' wxiye'.

⁴⁸ Na'ch goll Natanaela'ne':

—¿Nakra chak nombi'o nad'?

Na' Jesúza' golle'ne':

—Ka zi' yidnelə Felípena' li', ble'id' li' xan yag yixwewa'.

⁴⁹ Na' goll Natanaela'ne':

—Maestro, lin' nako' Xiiñ Chioza'. Na' lin' beena' zidnabia' neto' ben' Israel.

⁵⁰ Na' goll Jesúza'ne':

—¿Adaa wnia' ble'id' li' xan yag yixwewan' chajli'o cha'? Zi' ile'chilo' dii xench aga ka dga.

⁵¹ Na' lekzka' gollch Jesúza':

—Dii li nia' le', ile'ile yabana' nyaljan, na' ben'ka' nak anjl che Chioza' chep chetjgake' lawa', nad', Ben' Bsel' Chioza' Yell-lioni.

2

Got' to wishagna' yella' le Caná

¹ Na' biyon lla got' to wishagna' yella' le Caná daa llia gana' mbaní Galileana', na' na' len xna' Jesúza'. ² Na' lekzka' goxgake' Jesúza' na' ben'ka' nakgake'ne' txen. ³ Na' shlak chak lñina' bibill vino che'ka', na' goll xna' Jesúza'ne':

—Ba bibill vino che ben'ki.

⁴ Na'ch che' Jesúza'ne':

—¿Berache nazo' nad' ka'? Biñ' gal' gon' daa llia bia' gon'.

⁵ Per xneena' golle' wen mandadka':

—Li gon kon bin in'e' le'.

⁶ Na' na' zoa xop yes' xen de yaj, dii choll nis, diika' chon llin kat' ben' Israelka' chixi chiyechgake' kon ka na ley che'ka'. Na' to to yes'ka' chollan ka do shon yid nis. ⁷ Na' che' Jesúza' wen mandadka':

—Li kaa nisa' loo yes'ki.

Na' wda'gake'n axt ka billa'chagakan. ⁸ Na'ch che' Jesúza' legake':

—Li gash' lataan ñaa na' li lljeen beena' ngoo lo neen.

Na' bengake' ka golle'. ⁹ Na' beena' ngoo lo neen bnixe' nisa' daa biyak vino, ni bi nezile' ga wza'n. Tochga wen mandadka' nezgakile', la' legaken' wdaagake' nisa'. Na'ch beena' ngoo lo neen goxe' bi'na' chshagna', ¹⁰ chi'eb':

—Yog' ben' zigaate chdie' vino wenna', na' kat' ba weej ben'ka' len lnina' dii zil, na'ch chdie' daa bi naktek wen. San li', ba bzagoo vino wenni na' axt naach chdio'n.

¹¹ Yel' waki dga ben Jesúza' yell Canána' daa llia gana' mbani Galileana', lennan' bene' dii nech. Na' ka' bli'e yel' wak che'na' nape', na'ch ben'ka' nongake' le' txen benlilall'gake'ne'.

¹² Na' ka wde, biyaje' Capernaúma' len xneena', len ben' bisheeka' na' len ben'ka' nakgake'ne' txen, na' wzoagake' na' to chop shon lla.

Bishesh Jesúza' ben'ka' chit' chde lesh' chyoodo'na'

(Mt. 21:12-13; Mr. 11:15-18; Lc. 19:45-46)

¹³ Na' ka ba zoa gal' lni Paskwa' daa chon ben' Israelka', wyaj Jesúza' Jerusalénna'. ¹⁴ Na' ka blline' lesh' chyoodo'na', ble'ile' lle' ben' chit'gake' goon, xil', na' palom, na' lekzka' na' chi' ben'ka' chisha' mecha'. ¹⁵ Na' ka ble'ile' ka chak, bene' to do tashj, na' kon len bisheshile' yog'lolle' lesh' chyoodo'na' lente goonka' na' xil'ka'. Na' bzalee xmech ben'ka' chisha' mecha' lo yona' na' bishi'e mes che'ka'. ¹⁶ Na' ben'ka' chit' palomka', golle' legake':

—Li yishesh baki ni! Bi gonzle lill Xa'na' ka lao yaa!

¹⁷ Na'ch ben'ka' nakgake'ne' txen jadingakile' Cho'a Xtil' Chioza' gana' nan: "Daa le chakid' lill xlato'na' len wlliayi'n nad'."

¹⁸ Na'ch ben' Israelka' lle' na' che'gake' Jesúza': —¿Bi yel' wak gono' dii wli'n napo' yel' wñabia' kwenche chono' diiki?

¹⁹ Na' che' Jesúza' legake': —Li yichinj yoodo'ni na' lo shonə llazə yiyona'n.

²⁰ Na'ch che' ben' Israelka' le': —Xopiyon yiz bengake' yoodo'ni, na' li' nazo' shonə llazə yiyono'n.

²¹ Per daa goll Jesúza' legake' ka', kwerp che'nan' bsaklebile' yoodo'na'. ²² Na'ch ka biban Jesúza' ladj ben' wetka', jadini ben'ka' nakgake'ne' txen daa wne', na' wyajle'gake' Cho'a Xtil' Chioza' na' dill'ka' be' Jesúza'.

Nombia' Jesúza' yichjlall'do' yog'cho

²³ Na' shlak zoa Jesúza' lni Paskwa' Jerusalénn'a', ben' zan wyajle'gake' che' daa ble'gakile' yel' wakka' bene'. ²⁴ Per Jesúza' bi bxenilallee legake', la' nombi'e yichjlall'do' yog'lol ben'. ²⁵ Aga byalljile' no yee le' nakan nak benecha', la' kwaslol nombi'e yichjlall'do'eka'.

3

Jesúza' bshaljlene' Nicodémona'

¹ Wzoa to fariseo ben'wle Nicodemo, na' goke' to ben' wñabia' ladj ben' Israelka'. ² Na' Nicodémona' wyaje' jawie' Jesúza' wal-lə na' chi'ene':

—Maestro, nezinto' Chioza' bselee li' kwenche wli' wsedilo' neto', la' bi gak gono' yel' wakka' chono' shel' bi zoalen Chioza' li'.

3 Na'ch Jesúza' chi'ene':

—Dii li nia' li', beena' bi yiyalj dii yoblə aga wak lljazoe' gana' chnabia' Chioza'.

4 Na' che' Nicodémona'ne':

—¿Nakra gon to ben' gol yiyalje' dii yoblə? La' aga wak yiyo'e loo lee xneena' kwenche yiyalje' sto shii.

5 Na' Jesúza' chi'ene':

—Dii li nia' li', kono gak yiyañ gana' zoa Chioza' chnabi'e shi bin' galjlenile' nis * na' yikob Espíritu che Chioza' yichjlall'do'ena' kwenche gake' ka ben' galj sto shii. **6** Beena' nak xiin_{ben} de beli chen, de beli chenchokzan nake'. Per beena' chikob Espíritu che Chioza'ne', nake' xiin_{ben} Chios na' de to yel' mban che' daa bi te cheyin. **7** Bi yibanilo' daa nia' li': “Yog' ben' chiyal' galje' dii yoblə.” **8** Kat' chze be'na' na' chajan kon ga cheenin, na' la'kzi chenicho ka sshag chonan aga nezicho galan za'n, ni bi nezicho galan zejan. Lekzkan' aga nezicho nakan chon Espíritu che Chioza' kwenche chiyalj ben' dii yoblə.

9 Na'ch wizñabi Nicodémona'ne':

—¿Nakra gak gakz dga?

10 Na' che' Jesúza'ne':

—Len naktio' to ben' chli' chsedi ben' Israelki, ana' bi nezilo' diiki? **11** Dii li nia' li', choe'nto' dill' che daa nezinto' na' daa ben ble'into', per bi chajle'le daa nanto' le'. **12** Shi bi chajle'le daa wnia'

* **3:5** Galjlenile' nis: bal ben'ka' nsed nagake' zejin daa chchoacho nisa', na' zi balgake' nagake' zejin nisa' daa chzani xna'chona' cho', na' zi balgake' nagake' zejin daa chixis chiyib Espírituna' cho' kat' chonlilall'cho Crítona'.

le' che diika' chak yell-lioni, galechlə shi we'len' le'
dill' çhe daa nak çhe yabana'?

¹³ 'Ni to konon' shep yabana', toz nad', Ben' Bsel' Chioza' Yell-lioni, nak' ben' za' yabana'. ¹⁴ Na' ka ben dii Moiséza' gana' bibi chashj ch_leb bdee bel de broncena' lee yaga', ka'kzan gongakile' nad', Ben' Bsel' Chioza' Yell-lioni. Wda'gake' nad' lee yaga'
¹⁵ kwençhe nottez ben' gonçlilall' nad' bi kwiayee, san gat' to yel' mban çhe' zejli kani.

Chaki Chioza'yog' ben' yell-lio

¹⁶ 'Daa le chakchgayi Chioza' ben' yell-lioni, bselee Xiine'na' tlish' tyaj kwençhe nottez ben' gonçlalleene' bi kwiayee, san gat' yel' mban çhe' zejli kani. ¹⁷ Chioza' bselee xiine'na' yell-lioni aga kwençhe wlliyee bemaan, san kwençhe yisle' legaken'.

¹⁸ 'Beena' nonçlilall' Xiin Chioza', bich nchoglo çhe' sak'zi'e, san beena' bi nonçlalleene', ba nchoglo çhe' kwiayee daa bi nonçlallee Xiin tlish' tyaj Chioza'. ¹⁹ Ba nchoglo kwiyai' ben' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel çhola' aga ka beeni'na'. ²⁰ Yog' ben'ka' chon diika' bi yejni'alallii chakzbangakile' beeni'na', na' aga willjabig'lat'gake' lawinna' daa chllebgake' wli'lawi dii mala' chongake'. ²¹ San ben'ka' zoagake' chongake' ka na dill' li çhe Chioza', chbig'gake' lao beeni' çhe'na' kwençhe gakbia' chongake' ka cheeni Chioza'.

*Juanna', beena' bchoa ben' nisa', be'che' xtill'
Jesúza'*

²² Ka wde, wyaj Jesúza' Judeana' len ben^{ka'} nakgake'ne' txen na' wzoagake' na' xtit wen, na' bchoagake' benⁿ nis. ²³ Na' Juanna' lekzka' chchoe' benⁿ nis gana' le Enón, gaozə gana' le Salim, la' na' de nis zil, na' chaj benⁿ kwenche chchoe' legake' nisa'. ²⁴ Diiki gokgakan kana' zi' koogake' Juanna' lillyana'.

²⁵ Na'ch ben^{ka'} nakgake' Juanna' txen gokdil-lengake' sto benⁿ Israel ni cheyi diika' yoologake' chongake' kwenche chixi chiyechgake' lao Chioza'. ²⁶ Na' wyajgake' jellgake' Juanna':

—Maestro, beena' wzeleno' shlaa yao Jordanna', beena' bi'o xtilleena', ba chchoe' benⁿ nis na' yog'zə benⁿ chajgake' kwite'na'.

²⁷ Na'ch che' Juanna' legake':

—Kono gak bi gon shi Chioza' bi wi'e latj.

²⁸ Kwinkzle benile kana' wnia' aga nadaan Críston'a', beena' chbezcho wsel' Chioza', san nak' to benⁿ bselee kwenche kwialoa' lawe'na' na' yep' benⁿ wzenaggake' che'. ²⁹ To ga chak wishagna', bi'na' chshagnan' ikaab' noola'. Na' bi'na' nllaguib' chi'b' kwitbaa, le chibaib' ka chenib' chshaljb'. Kayenⁿnan chak cha', le chibaid' daa chzenaggake' che Críston'a'. ³⁰ Len' zizikchli seyi che', na' nad' bichtek seyi cha'.

Beena' za'yabana'

³¹ 'Ka nak beena' za' yabana', len' zak'chi' aga ka yog'lol benⁿ. Na' ben^{ka'} lle' yell-lioni, chino-gake' daa de lo yell-lionizə, na' che yell-lionizə choe'gake' dill'. San beena' za' yabana' zak'che' aga ka yog'lolte benⁿ, ³² na' choe' dill' cheyi diika' ba ben ble'ile' yabana', per balchga benⁿ chajle'

xtilleena'. ³³ Na' nottez beena' chajle' che', chli'e Chioza' cho'e dill' li. ³⁴ Beena' bsel' Chioza', cho'a xtill' Chiozan' cho'e, la' Chioza' no'ene' do ka nak Espíritu che'na'. ³⁵ Chioza' chakile' Xiiñe'na', na' ba bene' lall' nee yog'olte dii de. ³⁶ Na' beena' gonlilall' Xiiñ Chioza' gat' yel' mban che' zejli kani. Per beena' bi cheeni gonlilalleene' bi gat' yel' mban che' zejli kani, san ile'ile' yel' zak'zi'na' we' Chioza'.

4

Bshaljen Jesúza' to nool Samaria

¹ Fariseoka' gokbe'gakile' ben' zanch nakgake' Jesúza' txen, na' ben' zanch chchoe' nisa' aga ka Juanna', ² la'kzi aga kwin Jesúzan' bchoe' ben' nisa', san ben'ka' nakgake'ne' txenan. ³ Na' ka gokbe'i Jesúza' ba nezi fariseoka' ben' zanch nakgake'ne' txen, na'ch bizee gana' mbani Judeana' ziyaje' gana' mbani Galiléana'lə.

⁴ Na' kwenche yilline' gana' mbani Galileana' chiyal' yidie' gana' mbani Samáriana'. ⁵ Na' billingake' to yell dii le Sicar, daa llia gana' mbani Samáriana'. Na' yella' llian gaozə gana' de yell-liona' be' dii Jacoba' xiiñe' dii Joséna'. ⁶ Na' lo yell-liona' llia posa' wden dii Jacoba'. Na'ch wche' Jesúza' cho'a posa' daa ba chjxakchgaile' zing-wee neza'. Na' ba chonan ka gobill. ⁷⁻⁸ Na' ben'ka' nakgake'ne' txen zejgake' yella' zjxi'gake' daa gaolengake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Beñ lat' nis yeej'.

⁹ Na'ch che' noolə Samáriana'ne':

—¿Berache chnabzilo' nad' nisa' yeejo'?, la' ben' Israel li', na' nool Samaria nad'.

Golle' ka' la' ben' Israelka' bi zoalengake' wen ben' Samáriaka'. ¹⁰ Na'ch che' Jesúza'ne':

—Shel'ka' nezshailo' daa chon Chioza' na' no nad' chnabid' li' nisa' yeej', ba wñabilo' nad' gon daa yeejo', shel'ka', la' nap' to nis yaa nis ban daa gon li'.

¹¹ Na' noola' chi'ene':

—Ben'do', bibi noxoo wlepilo' nisa', na' posi le zitjan. ¿Gara lljxi'o nis yaa nis banna' gono' nad' nazo' ka'? ¹² Dii xozxto'cho Jacoba' bkwaanlene' neto' posi gani weeje', na' weej xiiñe'ka' na' bayix' che'ka'. ¿Achakilo' zak'chilo' ka le'?

¹³ Na' che' Jesúza'ne':

—Nottezə ben' cheeje' nis che posi, wbilchkzile' dii yoblə. ¹⁴ San beena' yeej nisa' daa wi'ane', aga wbilchile'. La' nisa' daa wi'ane' nakan ka to dii galchga loo yichjlall'do'ena' na' gonan ka gat' yel' mban che' zejli kani.

¹⁵ Na'ch che' noola'ne':

—Ben'do', ben nad' nisa' no' ka' kwenche bich iblid' na' bich yid beja' ni.

¹⁶ Na' che' Jesúza'ne':

—Biyaj jañe ben' cho'na', na' dalene' ni.

¹⁷ Na' che' noola'ne':

—Aga no ben' cha' zoa.

Na' Jesúza' chi'ene':

—Lekzilo' no' ka', aga no ben' cho' zoa. ¹⁸ La' ba gok gay' ben' cho'ka', na' beena' zoaleno' naa ni binshagna'lenkzo'ne'. Shlikzan ba wñio'.

¹⁹ Na'ch noola' chi'ene':

—Ben'do', ba gokbe'id' nako' to ben' chyixjee daa na Chioza'. ²⁰ Dii xozxto'nto'ka' be'la'ogake'

Chioza' lo yaani, na' le' ben' Israel nale chonan byen we'la'ochone' Jerusalénna'.

21 Na' che' Jesúza'ne':

—Noolə, wyajle' cha', wllin lla kat' bich gonan byen yidle lo yaani, ni bich gonan byen sha-jle Jerusalénna' kwenche we'la'ole Xacho Chioza'.

22 Le' ben' Samaria ni bi nombia'le non choe'la'ole, san neto' ben' Israel nombia'nto' Chioza', beena' choe'la'onto', la' ladjnto'nan' ichej beena' yisle' ben' kwenche bi kwiayi'gake'. **23** Ba zoa illin lla, wa ba bllinkz llana' ben'ka' dii li choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'. **24** Chioza' nake' Espíritu, na' ben'ka' cheengakile' we'la'ogake'ne', chiyal' we'la'ogake'ne' dowalj na' do yichj do lall'gake'.

25 Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wzajniile' cho' yog' diiki.

26 Na' che' Jesúza'ne':

—Nad'kzan' beena' no' ka', na' len' chshaljlene' li'.

27 Na' shlak choe'lene' noola' dill', billin ben'ka' nakgake'ne' txen na' bibangakile' daa chshaljlen Jesúza' to noolə. Per ni toe' bi biyaxji inabile'ne' bin cheeni noola' wa bi dillaan chshaljlene'ne'. **28** Na'ch noola' bkwaane' chee nis che'na' na'zə, na' biyaje' jayelle' ben' wlall che'ka':

29 —Li da lljawiacho to ben' ba wne' nad' yog' diika' ba ben'. ¿Aaga len' Crístona', lla?

³⁰ Na'ch blleshgake' yella' wyajgake' gana' chi' Jesúza'. ³¹ Na' shlak ziyaj noola' zeyid ben'ka' nak Jesúza' txen che'gake'ne':

—Maestro, wdao lat'.

³² Na' Jesúza' chi'e legake':

—De to yel' wao cha' daa bi nombia'le.

³³ Na'ch che' ljwell ben'ka' nakgake'ne' txen:

—¿Anti no ba bidwa' dii wdawe', lla?

³⁴ Na' che' Jesúza' legake':

—Yel' wao cha'na' nakan daa chon' ka cheeni beena' bsel' nad' na' wzeeoola' daa cheenile' gon'.

³⁵ Le' nazle: "Chyalljch zi tap beo' kwenche yizi' yilapcho." Per nad' nia' le', li wwiakachi ba de daa yizi' yilapcho. ³⁶ Beena' chyixjee cho'a xtill' Chioza' naa, zaklebile' to ben' ba chilalile' chizi' chilape'. Na' ben'ka' chzenag daa chyixji'e, gat' to yel' mban chegake' zejli kani, na' beena' goz yibalenile' beena' chizi' chilap. ³⁷ Nakan ka dillaa de daa na: "Ben' yoblan chaz na' ben' yoblə chizi' chilap." ³⁸ Nad' ba bselaa le' lljalaple gana' bi bllaglole gozle, la' le' gonle ka wzenag ben' cho'a xtill' Chioza' daa wdixjee ben' yoblə.

³⁹ Ben' zan ben' Samáriaka', ben'ka' lle' yell Sicara' ben'lilall'gake' Jesúza' daa goll noola' legake': "Ba wne' nad' yog'te dii ba ben'." ⁴⁰ Na'ch ka bllingake' gana' chi' Jesúza', got'yogakile'ne' kwenche yigaanlene' legake'. Na' bigaan'e na' chop lla. ⁴¹ Na' ben' zanch ben'lilall'gake'ne' daa bengakile' dillaa cho'e. ⁴² Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na' nezinto' dii li lekzen' beena' yisla ben' yell-lioni kwenche bi kwiayi'gake'.

Jesúza' biyone' xiin to ben' wñabia'

⁴³ Na' ka gok chop lla, bizee biyaje' gana' mbaní Galileana'. ⁴⁴ Kwinkz Jesúza' wne' nan to ben' chyixjee daa che' Chioza'ne' aga no chgoo le' balaan lalle'na'. ⁴⁵ Na' ka billine' gana' mbaní Galileana', blebgake'ne' daa ble'gakile' yog' daa bene' Jerusalénna' ka gol' lñi Paskwa'.

⁴⁶ Na' dii yoblë wizaj Jesúza' yell Canána' daa llia gana' mbaní Galileana', gana' biyone' nisa' vino. Na' yella' zoa to ben' zakii ben' chon llin che ben' wñabia'na', na' zoa to xiine' bi' byo bi shao'b'. ⁴⁷ Na' ka wñezile' ba billin Jesúza' Galileana' zizee Judeana'læ, na' wyaje' lawe'na' got'yoile'ne' shaje' lljayene' bi' che'na' daa ba chakshwetb'. ⁴⁸ Na'ch che' Jesúza'ne':

—Aga wyajle'le cha' shi bibi yel' wak gon' ile'ile.

⁴⁹ Na' ben' wñabia'na' chi'ene':

—Ben'do', ben goklen dagach ñaate, shategali bin' guet bi' cha'na'.

⁵⁰ Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee.

⁵¹ Na' ka ba zoa yilline' lille'na' jatil xmose'ka' le', che'gake'ne':

—Ba biyaki bi' cho'na'.

⁵² Na'ch wñabile' legake' ka do bi gor wzolo chiyakshao'lall'b'. Na' che'gake'ne':

—Daa neji do ka chida to bichejb' dii lana'.

⁵³ Na'ch gokbe'i xabaa biyakshao'lall'b' ka gora' goll Jesúza'ne': "Biyaj jawia. Aga wet bi'na'." Na' le' len yog' ben'ka' zoa lille'na' ben'lilall'gake' Jesúza'.

⁵⁴ Dga gok de wchopi yel' wakka' ben Jesúza' Galileana' ka zizee Judeana'.

5

Biyon Jesúza' to ben' net ni'a nee

¹ Ka wde gok diiki, gol' to lñi che ben' Israelka' Jerusalénna', na' biyaj Jesúza' lñina'. ² Na' Jerusalénna', gaozə cho'a puerta' le Puert Che Xil'ka' llia to tang dii le Betesda dill' hebreo. Na' gay' koridor neçhjan tanga'. ³ Na' loo koridorka' de ben' zan ben' we', no ben' lchol, no ben' bi chak sa' wen, na' no ben' net ni'a nee, chbezgake' ta nisa'. ⁴ La' zoa kat' chetj to anjl cho'a tanga' chte' nisa', na' beena' chyobi cho'e loo nisa' chiyoll chta anjla'n chiyakile' bittezə yillwe' che'ile'. ⁵ Na' ladji ben'ka' lle' na' len to ben' ba gok shin'shonichoa yiz bi shawee. ⁶ Na' ble'i Jesúza'ne' na' gokbe'ile' ba wlla die' ka', na'ch chi'ene':

—¿Acheenilo' yiaykilo'?

⁷ Na'ch beena' bi shao' chi'ene':

—Ben'do', aga no zoa cha' wletje' nad' loo nisi kat' chdan. Na' kat' chakid' yetj' loo nisa', ben' yoblə lii chjsho'tie' lo'inna'.

⁸ Na'ch che' Jesúza'ne':

—Biyas, bitob daa cho'na' biyoa'n na' bigoo nez.

⁹ Na' katena' biyakile' na' lii bitobtie' daa che'na' biyo'en na' bigwee nez. Gok dga lla sabda', llana' chombaangake'. ¹⁰ Na' ben'ka' chñabia' ben' Israelka' gollgake' beena' biyaki:

—Lla chombaancho naa. Aga bilsens de woo daa cho'na'.

¹¹ Na'ch che' beena' legake':

—Beena' biyone' nad' len' wne': “Bitob daa cho'na' biyoa'n na' bigoo nez.”

¹² Na'ch che'gake'ne':

—¿Nora beena' wna li': “Bitob daa cho'na' biyoa'n na' bigoo nez”?

¹³ Na' beena' biyaki aga nezile' non biyon le', la' Jesúza' ba bikwase' ladj ben'ka' lle' na'. ¹⁴ Na'tech billag Jesúza'ne' lesh' chyoodo'na', na' chi'ene':

—Ba biyakilo' naa. Bich bi dii mal gono' kwenche ki wtilcho' dii walch.

¹⁵ Na'ch beena' biyaje' lao ben' wñabia' che ben' Israelka' jayelle' legake' nan Jesúza' biyone'ne'.

¹⁶ Na' daa ben Jesúza' yel' waka' lla sabda', llana' chombaangake', goklall'gake' witgake'ne'. ¹⁷ Na' Jesúza' chi'e legake':

—Xa'na' bittezə lla chone' llin na' ka'kzə nad'.

¹⁸ Na'ch ben' wñabia' che ben' Israelka' goklall'gake' witgake'ne' aga toz daa wdishje'leya' daa cho'en dill' che llana' chombaangake', san lekzka' daa chon kwine' ka Chios daa chi'e Chioza' nake' Xe'.

Yel' wñabia' daa nap Xiin Chioza'

¹⁹ Na' Jesúza' chi'e legake':

—Dii li nia' le', nad', Xiin Chios, aga bi gak gon' tobia'loz', san daa chle'id' chon Xa'nan' lekzannan' chon'. ²⁰ La' Xa'na' chakile' nad' na' chliile' nad' yog' diika' chone'. Na' wli'chile' nad' dii zak'techla ka diiki, dii gonan ka yibanchise. ²¹ Ka chon Xa'na' chisbane' ben' wetka' na' chiyo'e yel' mban chegake', ka'kzə chon nad', Xiine', cho'a yel' mban che nottezə ben' cheenid' wi'an. ²² Na' Xa'na' aga ga chchogloe' che ben', san nad' nak' Xiine', ba bene' lall' na' wchogloa' che yog'lol ben'. ²³ Bene' ka' kwenche yog' ben' koogake' nad' balaaŋna' ka daa chgoogake' Xa'na'. Beena' bi chgwee nad'

balaan, nad' nak' Xiiñ Chios, lekzka' bi chgwee Xa'na' balaan, beena' bsel' nad'.

²⁴ 'Dii li nia' le', beena' chzenag xtillaana' na' chonlilallee beena' bsel' nad', gat' yel' mban che' zejli kanı. Na' aga bi de dii gonan ka choglo che' sak'zi'e, san ba bile' lo yel' wita' na' ba zoe' lo yel' mban daa bi te cheyin. ²⁵ Dii li nia' le', wllin lla kat' ben' wetka' yengakile' inia' legake', nad' nak' Xiiñ Chios, na' ben'ka' yengakile' kat' inia' na' yibangake'. ²⁶ Xa'na' nape' yel' wak kwenche wi'e yel' mban che ben' daa bi te cheyin. Ka'kza ba bene' nad' Xiiñe' yel' wak kwenche wi'a yel' mban che ben' daa bi te cheyin. ²⁷ Na' lekzka' ba bene' nad' yel' wñabia' kwenche gon' yel' joschis daa nak' Ben' Bsel' Chioza' Yell-lioni. ²⁸ Bi yibangile daa nia' ka', la' wllin lla wllin gor yeni yog'te ben' wetka' kat' inia' legake'. ²⁹ Na' ka yengakile' inia' na'ch yichejgake' loo bana'. Na' ben'ka' ben dii wanna' yibangake' na' si'gake' banez to yel' mban daa bi te cheyin, na' ben'ka' ben dii mala', yibangake' na' choglo tegake' lo yel' zak'zi'na' zejli kanı.

Jesúza' bli'e yel' wñabia' che'na'

³⁰ 'Ni to bibi gak gon' tobia'loz', san chchogloa' che ben' kon ka nllia Chioza' bia' gon', na' kon ka nakannan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lennan' chon'. ³¹ Na' shi nad' wi'a dill' che kwin', nezid' aga no shajle' cha'. ³² San zoa to ben' cho'e xtillaana', na' nezid' daa ne' cha' nakan shlichcha. ³³ Le' bsel'le ben' janabgakile' Juanna' bi ka in'e cha', na' dillaa daa bi'e cha' nakan dii li. ³⁴ La'kzi nad' bi chyalljid' we' ben' yell-lioni xtillaa; nia' le'

diiki kwenche yilale na' bi kwiayi'le. ³⁵ Juanna' goke' ka to yi' dii bzeeni' na' le bibaile bzenagle che' tolde. ³⁶ Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'. ³⁷ Xa'na', beena' bsel' nad', lekzka' ba bi'e dill' cha'. Ni shlin bigan' yenile inie' ni bin' ile'ilene' nak nake'. ³⁸ Na' cho'a xtilleena' bin' sho'n loo yichjlall'do'lena', la' bi chajle'le cha', nad' ben' bselee. ³⁹ Le' chsedchgale Cho'a Xtill' Chioza' daa chakile le'inna' yillelile naklə ka gonle kwenche gat' yel' mban chele zejli kanı. Na' la'kzi Cho'a Xtill' Chioza' choe'n xtillaana', ⁴⁰ aga cheenile gakle nad' txen kwenche gat' yel' mban chele daa bi te cheyin.

⁴¹ 'Aga chyalljid' no koo nad' balaanq. ⁴² Na' nombia' le', na' nezid' aga chakile Chioza'. ⁴³ Xa' Chioza' bselee nad' na' ba bid', na' bi chzenagle cha'. San shi yid ben' yoblə tobialoze', beena'lan le gak chele. ⁴⁴ ¿Nakrakzə gonle shajle'le cha? La' gangazə chgoo ljwell-le balaanq, na' bi chinole sho'le balaanq che beena' zeelo nak Chios. ⁴⁵ Bi gakile nad' gaw' xya chele lao Xa' Chioza', la' zoa sto ben' gawe' xya chele. Dii Moiséza', beena' nonle vez gaklene' le', len' gawe' xya chele lao Xa' Chioza'. ⁴⁶ La' shel' chajle'le daa bzej dii Moiséza', lekzka' wyajle'le cha', shel'ka'. La' len' bzeje' xtillaana'. ⁴⁷ Na' daa bi chajle'le che daa bzej dii Moiséza', ¿nakra gonle shajle'le che diiki nia'?

6

Bwao Jesúza' wdeli gayaa mil ben'
(Mt. 14:13-21; Mr. 6:30-44; Lc. 9:10-17)

¹ Na' ka wde, Jesúza' wyaje' shlaa nisdo' che Galileana', daa lekzka' le nisdo' che Tiberias. ² Na' ben' zan janogake'ne' daa ble'gakile' yel' wakka' bene' kana' biyone' ben'ka' bi shao'. ³ Na'ch wyep Jesúza' to lo yaa na' wche'lene' ben'ka' nakgake'ne' txen. ⁴ Na' ba zoa gal' lni Paskw che ben' Israelka'. ⁵ Ka ble'i Jesúza' ben' zan ba bllin gana' chi'e, na' chi'e Felípena':

—¿Gara lljxi'cho dii gao yog' ben'ki?

⁶ Golle'ka' daa chakile' la'shki bi yee Felípena', la' ba nezkzile' nakan gone'. ⁷ Na' Felípena' chi'ene':
—Aga waki laxj to ben' che xon' beo' lljxi'yicho dii gao yog' ben'ki lat' wej.

⁸ Na' sto beena' nak Jesúza' txen lie' Andrés, ben' bish' Simón Pédrona', chi'ene':

⁹ —Ni ze to bi' xkwid' no'ab' gay' yetxtil de cebada na' zi chop bel. Per bizə daa par yog' ben'ki.

¹⁰ Na'ch Jesúza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zə gok ka do gayaa mil.

¹¹ Na'ch bex' Jesúza' yetxtilka', na' bi'e Chioza' yel' choxken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' axt ka belgakile'. Na' lekzka' bene' che belka'. ¹² Na' ka belgakile', na'ch chi'e ben'ka' nakgake'ne' txen:

—Li yitop yog'lol dii lao'ka' bichooñan kwenche bibi gakditj.

¹³ Na'ch bitopgake'n, biyakte shllin xet' diika' bichooñan lao yetxtilka' gay'. ¹⁴ Na' ka ble'i ben'ka' yel' waka' daa ben Jesúza', na'ch che' ljwellgake':

—Dii li beenin nake' beena' llia bia' yid yell-lioni kwenche chixji'e daa che' Chioza'ne'.

¹⁵ Na' daa gokbe'i Jesúza' cheengakile' yi_{che}'gake'ne' kwenche wzoagake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

*Wza' Jesúza' lo nisdo'na'
(Mt. 14:22-27; Mr. 6:45-52)*

¹⁶ Ka ba chal, ben'ka' nak Jesúza' txen biyetj-gake' cho'a nisdo'na'. ¹⁷ Na' biyoogake' to loo barkw kwenche ziyajgake' yell Capernaúma'. Ba gol na' bin' yillin Jesúza' kwite'ka'. ¹⁸ Na'ch wzolo wzechga be'na' na' wzolo chas chat' nisdo'na'. ¹⁹ Na' ka do gay' wa xop kilómetro ba wza'len barkwa' legake' lo nisdo'na' kat' ble'gakile' Jesúza' zeje' tlo nisdo'na' zjatile' barkwa' na' le bllebgake'. ²⁰ Na' Jesúza' chi'e legake':

—Nad'kzan, ibi illeble!

²¹ Na' chibagakile' bigoogake'ne' loo barkwa', na' lii bllintekzgake' gana' chwiagake' illingake'.

Zan ben' chiyilgake' Jesúza'

²² Na' betiyo gokbe'i ben'ka' bigaan shlaa nisdo'na' nan tochga barkwa' got' na' to ben'ka' nonz Jesúza' txen biyoogake'n na' bi len Jesúza' biyoolene' legake'. ²³ Na' gaozə gana' wdaogake' yetxtilka' ka wde be' Xancho Jesúza' Chioza' yel' choxken, bllin sto chop barkw dii za' yell Tibériaiza'. ²⁴ Na' ka gokbe'i ben'ka' aga no Jesúza' nla' ni ben'ka' nakgake'ne' txen, na'ch biyoogake' loo barkwka' ziyajgake' Capernaúma' jadilgake'ne'.

Jesúza' nake' ka to yel' wao dii chon'a'n yel' mban

25 Na' ka bllingake' shlaa nisdo'na' jadi'gake'ne', na' gollgake'ne':

—Maestro, ¿bat biyedo' ni?

26 Na' Jesúza' chi'e legake':

—Dii li nia' le', chiyiljle nad' aga daa wyanilati'le bi zejin yel' wakka' benan', san daa wdaozle axt ka beljilen. **27** Bi yilal yizodzile kwenche gat' dii yeej gaole, la' dii te cheyin nak daa. San li gal' kwe'no daa gon yel' mban chele zejli kanı, daa gon' nad', Ben' Bsel' Chioza' Yellioni. La' Xa' Chioza' ba bene'n lall' na' wi'an.

28 Na' che'gake'ne':

—¿Beran chiyal' gonnto' kwenche gonnto' daa cheeni Chioza'?

29 Na' che' Jesúza' legake':

—Daa cheeni Chioza' gonle, gonlilall'le nad', ben' bselee.

30 Na'ch che'gake'ne':

—¿Bera yel' wak gono' ile'into' kwenche shajle'nto' cho'? ¿Bi ka gono'? **31** Dii xozxto'choka' wdaogake' daa le maná latja' gana' bibi chashj chleb, ka na Cho'a Xtil' Chioza' gana' na: "Yel' wawa' daa za' yabana' bi'en wdaogake'."

32 Na' che' Jesúza' legake':

—Dii li nia' le', aga dowaljyen' yel' wao daa za' yabanan' be' dii Moiséza' legake', san Xa'na' chone' daa nak dowalj yel' wao daa za' yabana'. **33** La' nad', ben' za' yabana', nak' ka to yel' wao dii choe' Chioza' ben' yell-lioki kwenche ibangake'.

34 Na'ch che'gake'ne':

—Ben'do', bengach neto' toshiizi yel' wawa' no' ka'.

35 Na' che' Jesúza' legake':

—Nad' nak' ka yel' wawa' daa choe'n yel' mban che ben'. Beena' gake' nad' txen, gake' ka ben' nelj nlla'i toshiizi. Na' beena' gonlilallee nad', gake' ka to ben' bichga ibili. ³⁶ Per kon ka ba wnia' le', la'kzi ba ble'ile nad' bi chajle'le. ³⁷ Yog' ben'ka' chon Xa'na'lall' na', gakgake' nad' txen. Na' beena' gake' nad' txen aga wzoa'nne' ka'lə. ³⁸ La' zaa yabana' na' zoa' yell-lioni aga kwenche gon' daa nazan chan', san zaa kwenche gon' daa cheeni Xa'na', beena' bsel' nad'. ³⁹ Na' Xa'na', beena' bsel' nad', cheenile' bi wi'a latj kwiayi' ni to ben'ka' ba wleje' kwenche gakgake' nad' txen. San cheenile' yisban' legake' ladji ben' wetka' kat' illin lla te che yell-lioni. ⁴⁰ Na' dgan cheeni Xa'na', beena' bsel' nad': chaklallee gat' yel' mban zejli kani che yog'lol ben' gakbe'i nak' Xiine' na' gonlilallee nad'. Na' nad' yisbanee ladji ben' wetka' kat' te che yell-lioni.

⁴¹ Na'ch ben' wñabia' che ben' Israelka' wzolol-gake' biz chon chnagake' che Jesúza' daa wne': “Nad' nak' yel' wao daa za' yabana.” ⁴² Na' che'gake':

—¿Aaga beenin Jesús, xiiŋ Joséna'? Nombia'cho xaxña' beeni. ¿Berače naze': “nad' za' yabana”?

⁴³ Na'ch che' Jesúza' legake':

—Bibi gon iŋazle cheyi daa wnia' le'. ⁴⁴ Ni to kono gak gon nad' txen shi Xa'na', beena' bsel' nad', bi gone' le' lall' na'. Na' ben'ka' nak nad' txen, yisban' legake' kat' te che yell-lioni. ⁴⁵ Lee librka' bzej dii ben'ka' wdixjee daa goll Chioza' legake' kani'yi nan: “Chioza' wli' wsedile' yog'lolte ben'.” Na' yog' ben' chzenag che Xa'na' na' chajni'gakile' daa ne', legaken' chongake' nad' txen.

46 'Aga ga zoa ben' ba ble'ile' Xa'na'; toz nad', ben' za' yabana', ba ble'idee. **47** Dii li nia' le', nottez ben' nonlilallee nad' de yel' mban che' zejli kan̄i. **48** Nadaan nak' ka yel' wawa' daa choe'n yel' mban che ben' zejli kan̄i. **49** Dii xozxto'leka' wdaogake' daa le maná latja' gana' bibi chashj chleb na' bia'kzə witgake'. **50** San nad' cho'a dill' che yel' wao daa za' yabana', na' beena' gawe'n aga bi yel' wit zejli kan̄i ile'ile'. **51** Nadaan nak' yel' wao daa za' yabana' daa cho'en yel' mban che ben'. Beena' gao yel' wawi, ibane' zejli kan̄i. Na' yel' wawa' daa wi'ane', lennan' beli chen cha'ni daa chzanid' kwenche gat' yel' mban che ben' yellioni.

52 Na'ch ben' Israelka' wzolo chshesh chnegake', che' ljhelle':

—¿Nakra gon beeni goñe' beli chen che'na' gao-chon?

53 Na' che' Jesúza' legake':

—Nad', Ben' Bsel' Chioza' Yell-lioni, dii li nia' le', shi bi gaole kwerp cha'ni na' shi bi yeejle chen cha'ni, aga wat' yel' mban chele daa bi te cheyin. **54** La' ben'ka' gaogake' kwerp cha'ni na' yeejgake' chen cha'ni, ben'kan' gat' yel' mban chegake' zejli kan̄i. Na' kat' illin lla te che yell-lioni, nad' yisbangakee ladji ben' wetka'. **55** La' kwerp cha'ni nakan dowalj yel' wao, na' chen cha'ni nakan dowalj dii cheeje'. **56** Beena' gao kwerp cha'ni na' yeeje' chen cha'ni, nake' nad' txen, na' lekzka' nad' nakee txen. **57** Xa'na', beena' bsel' nad', zoe' zejli kan̄i na' de yel' mban cha' daa mbane' le'. Na' ka'kzan beena' gao beli chen cha'ni ibane' daa wi'ane' yel' mbanna'. **58** Beli chen cha'ni nakan yel' waw dii za' yabana'.

Ka nak yel' wawi, aga nakan ka daa le maná daa wdao dii xozxto'leka' na' bia'kzə witgake'. Beena' gao yel' wawa' daa za' yabana', ibane'zejli kañi.

⁵⁹ Diikin wna Jesúza' shlak bli' bsedile' ben' gana' chdop chllag ben' Israelka' choe'lwillgake' Chioza' yell Capernaúma'.

Dill' dii nsa' yel' mban

⁶⁰ Na' zan ben'ka' nogake'ne', ka bengakile' daa wna Jesúza', na' wnagake':

—Lallj inlleb nak dga chli' chsedi beeni. ¿Notgui gon ka ne'?

⁶¹ Na' Jesúza' gokbe'ile' bi wyazlall'gake' xtillee'na', na'ch wñabile' legake':

—¿Achakzbanile dga ba wnia' le'? ⁶² ¿Nakra gonle shel'ka' ile'ile nad', Ben' Bsel' Chioza' Yell-lioni, yiye'p gana' wzaa? ⁶³ Espíritu che Chioza' cho'e yel' mban che ben', la' beli chenna' aga bi zakiin. Dill'ka' ba wnia' gonan ka soalen Espírituna' le' na' gat' yel' mban chele. ⁶⁴ Per bia'kzə zoa bal-le bi chajle'le.

Goll Jesúza' legake'ka', la' dezdz nechte ba nezkzile' no ben'ka' bi chajle' che' na' non gon le' lo na' ben' malka'. ⁶⁵ Na' chi'e legake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

⁶⁶ Na' lo llana'tez ben' zan ben'ka' nakgake'ne' txen bkwasgake' bich janogake'ne'. ⁶⁷ Na'ch che' Jesúza' ben'ka' shlliñ, ben'ka' nakgake'ne' txen:

—¿Alekzka' lenle cheenile yiyyajle?

⁶⁸ Na' Simón Pédrona' chi'ene':

—Xan', aga nochlə cheyi zakii wzenagnto', la' tozo' lin' choo dillaa daa chonan ka gat' yel' mban

chento' zejli kan̄i. ⁶⁹ Ba wyajle'nto' cho', na' nezinto' lin' Crístone', Xiiñ Chios yaa Chios banna'.

⁷⁰ Na' Jesúza' chi'e legake':

—Ba wlej' shllinle gakle nad' txen. Per tole nakle dii xiwaa txen.

⁷¹ Wne' ka' che Jud Scariota', xiiñ to ben' le Simón, la' nezile' nan Juda' gone'ne' lall' na' ben' malka', la'kzi wlene' ben'ka' shllin.

7

Ben'ka' nak ben' bish' golj Jesúza' bi wyajle'gake' che'

¹ Ka wde dga, Jesúza' wde' doxen gana' mbaní Galileana'. La' bi goklallee shaje' gana' mbaní Judeana' daa cheeni ben' wñabia' che ben' Israelka' witgake'ne'. ² Na' ka ba zoa gal' lni che ran-shdo'ka' daa chon ben' Israelka' yog' yiz, ³ ben'ka' nak ben' bish' golj Jesúza' che'gake'ne':

—Bi yigaano' nizə, san wyaj Judeana' kwenche ben'ka'ba non li' txen ile'gakile' yel' wakka' chono'.

⁴ La' beena' cheeni seyi che', aga chkwashee diika' chone'. Bachgali chono' yel' wakki, jentegan lao yog'lol ben'.

⁵ La' ni ben' bisheekan' bi wyajle'gake' che'.

⁶ Na'ch che' Jesúza' legake':

—Bin' illin lla illin gor gon' daa llia bia' gon'. San le', bat'tez wak shajle. ⁷ Ben' yell-lioki bibi de dii gonan ka gakzbangakile' le', san nadaan chakzbangakile' daa chepgakee malan' chongake'. ⁸ Li shaj le' lnina'. San nad' bi saa, la' bin' illin lla illin gor gak cha' daa llia bia'.

⁹ Biyoll golle' legake' ka' na' bigaane' Galileana' zi xtit.

Wyaj Jesúza' lnina'

¹⁰ Na' ka wde wza' ben' bisheeka', lekzka' wzee wyaje' lnina' do ngash'z. ¹¹ Na' ben'ka' chnabia' ben' Israelka' chiyilgake'ne' lo lnina', che' ljwellgake':

—¿Garanzi beena', lla?

¹² Na' ladj ben'ka' lle' lnina', ben' zan choe'gake' xtil' Jesúza'. Bale' che': "Nake' ben' wen." Na' zi bale' che': "Bi nake' ben' wen, la' chdaze' chziyee ben'."

¹³ Per ni to kono biyaxji we' xtil' Jesúza' ka nla'z daa chlebgake' ben'ka' chnabia' ben' Israelka'.

¹⁴ Na' ba zej shon tap lla chak lnina' ka bllin Jesúza' gana' zoa yoodo'na' na' wzoloe' chli' chsedile' ben'. ¹⁵ Na' chibani ben' Israelka', na' che' ljwelle':

—¿Nakra chak chli' chsedil beeni ben', len aga bi nsede'?

¹⁶ Na' che' Jesúza' legake':

—Diika' chli' chsedid' aga nakan dii chyiljlall'z', san beena' bsel' nad', len' bli' bsedile' nad' diiki.

¹⁷ Nottez ben' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chyiljlall'z'. ¹⁸ Beena' tobialoze' cho'e xtillee, balaan che kwinzen' chyilje', san beena' chyilje' sho' beena' bsel' le' balaan, len' cho'e dill' li, na' aga bi dill' wxiye' cho'e.

¹⁹ 'Dii Moiséza' bene' le' ley che Chioza', na' ni tole bi chonle ka nllian bia' gonle. ¿Biche cheenzile witle nad'?

²⁰ Na'ch ben'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

21 Na' che' Jesúza' legake':

—Tochga yel' waka' ba ble'ile ben' llana' chombaancha na' yog'le chibani. **22** Dii li dii Moiséza' bene' byen yog'tele nakle ben' byo chiyal' sho'le sen̄ daa le circuncisión, la'kzi aga len' wzololene'n, san dii xozxto'leka'ten. Daan chgoole bi' byodo'ka' senña' la'kzi nakan lla chombaancha. **23** Na' shi choe'le latj sho' bi' byodo'ka' señ̄ daa le circuncisión lo llana' chombaancha kwenche gak ka na leya' daa bzej dii Moiséza', ¿bic̄he chllaazle nad' daa biyon' to ben' llana' chombaancha? **24** Bi wchoglisle che ben' shi bi chle'ile chone', san cheenin inezile nakyen'an nakan kwenche we'le dill' kon ka nakan.

Jesúza' wne' zee gana' zoa Chioza'

25 Na'ch bał ben' Jerusalénka' nagake':

—¿Aaga beenin cheengakile' witgake', lla? **26** Li wwia ka cho'e dill' ladji lkwe' ben', na' ni to kono bi che'. ¿Anti ba chajle'lza ben' wñabia'ka' nan dii li beeni nake' Crítona', beena' wsel' Chioza' inabi'e, lla? **27** Cho' nezicho ga ben' beeni. San kat' yid beena' nak Crítona', ni to kono inézi galə za' beena'.

28 Jesúza' chli' chsedile' ben'ka' yoodo'na', na' ka benile' daa wna ben'ka' che', na' wñie' zillj chi'e:

—Chakzile nombia'le nad' na' nezile ga ben' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene', **29** san nad' nombi'ane', la' gana' zoen' wzaa, na' len' bselee nad'.

30 Na'ch bałe' goklall'gake' gox'gake'ne', per ni toe' bi bex' le', la' bin' illin lla illin gor gak che'

daa llia bia'. ³¹ Na' ben' zan wyajle'gake' che', na' wnagake':

—Kat' yid beena' nak Crítona', beena' wsel' Chioza' inabi'e, ¿awli'techle' yel' wak aga ka daa chli' beeni, lla?

Goklall'gake' gox'gake' Jesúza'

³² Na' fariseoka' bengakile' dillaa daa choe' ben'ka' che Jesúza'. Na' legake' len bxozka' chnabia' bsel'gake' ben'ka' chap yoodo'na' kwenche lljex'gake' Jesúza'. ³³ Na' Jesúza' golle':

—Aga sshach soalen' le', na'ch yiayaa gana' zoa beena' bsel' nad'. ³⁴ Na' yiyilje nad' per aga willelile nad' daa bi gak yidle gana' lljazoa'.

³⁵ Na'ch ben' Israelka' che' ljwellgake':

—¿Garan yiayaj beeni na' bich yillelichone', lla? ¿Anti gana' lle' ben' wlall chechoka', ben'ka' lle' lall ben' zit'kan' shaje' kwenche lljasedile' ben' griegoka', lla? ³⁶ ¿Beran zejin daa ne': “Yiyilje nad', per aga willelile nad' daa bi gak yidle gana' lljazoa”?

Espíritu che Chioza' nake' ka nis yaa nis ban

³⁷ Na' llana' zeelo gok lnina', llana' nak lla choo lla xen, wzolla' Jesúza' na' wñie' zillj, chi'e:

—Shi nole chbili, li da yeejle nisa' daa gon' le'.

³⁸ Na' gak kon ka na Cho'a Xtil' Chioza' gana' nan beena' gonlilallee nad', gak loo yichjlall'do'ena' ka ga chaltit nis yaa nis ban.

³⁹ Na' daa wna Jesúza' ka', zejin soa Espíritu che Chioza' loo yichjlall'do' beena' gonlilall' le'. La' ka gora' bin' yidsoa Espírituna' loo yichjlall'do' ben' daa bin' sho' Jesúza' balaanña' daa llia bia' sho'e kat' yiyepe' gana' zoa Chioza'.

Gok ben'ka' chop shon kwenlə

⁴⁰ Na' bal ben'ka' bengakile' daa wna Jesúza' na' wnagake':

—Dii li beeni nake' beena' llia bia' yid kwenche chixji'e daa che' Chioza'ne'.

⁴¹ Na' zi bale' che'gake':

—Beenikzan' Crístona', beena' chbezcho wsel' Chioza' inabi'e.

Na' zi bale' che'gake':

—¿Achakile ladji ben' Galileaka' ichej beena' wsel' Chioza' inabi'e? ⁴² Cho'a xtil' Chioza' nan lo dia che dii Davina' galj beena' nak Crístona', na' gake' ben' yell Belén ka dii Davina'.

⁴³ Ka' gok, gokgake' chop shon kwenlə ni che Jesúza'. ⁴⁴ Bale' goklall'gake' gox'gake'ne', per ni toe' bi biyaxji.

Ben'ka' wnabia' ben' Israelka' bi wyajle'gake' che Jesúza'

⁴⁵ Na'ch ben'ka' chap yoodo'na' billingake' gana' zoa fariseoka' len bxozka' chnabia'. Na'ch che'gake' legake':

—¿Biche bi bche'lene'?

⁴⁶ Na' ben'ka' chap yoodo'na' che'gake':

—Ni to konon' we' dill' ka dillaa choe' beena'.

⁴⁷ Na'ch che' fariseoka':

—¿Alekzka' lenle ba wxiyee? ⁴⁸ Ni to ben' wnabia' chechoka', ni neto' fariseo bi chajle'nto' che'. ⁴⁹ Per ben'ki bi nombia'gake' leya', ba wlliayi'gake'.

⁵⁰ Na' farisewa' le Nicodemo, beena' wyaj lao Jesúza' wal-lə, chi'e legake':

⁵¹ —Ley chechona' nan aga wak wchoglocho che to ben' inacho chone' mal shi bin' wzenagcho

dillaa wi'e kwenche i_ñezicho bin chone'. ¿Anti aga kan' nakan?

⁵² Na'ch che'gake'ne':

—¿Alekzka' ben' Galilea li'? Bsed kwenche i_ñezilo' ni to ben' chyixjee daa che' Chioza'ne' bin' ichej gana' mbani Galileana'.

⁵³ Na'ch billeshgake' ziyaj lill Ɂhe Ɂhegake'.

8

Noola' bidol'len ben' byona'

¹ Na' Jesúza' wyaje' lo Yaa Olívoza'. ² Na' betiyo ka wyeeni' wizaje' yoodo'na'. Na' ben' zan inlleb wbig' kwite'na', na' wchi'e wzoloe' bli' bsedile' legake'. ³ Na'ch ben'ka' chli' chsedi leya' len fariseoka' n_ñche'gake' to noolə bidol'lene' to ben' byo, na' bzegake'ne' ladj ben'ka' lle' na'. ⁴ Na' che'gake' Jesúza':

—Maestro, ba bidolinto' nooli kon to ben' byo.

⁵ Na' _ñezinto' leya' daa bzej dii Moiséza' nan chiyal' witcho noolka' chon ka' kon yaj. ¿Shera li', bi ka ino'?

⁶ Che'gake'ne' ka' kwenchez kwejgake'ne' dill' ga si' sengake' na' gaogake' xya Ɂhe'. Na'ch Jesúza' bchekee bzeje' lo yona' kon xbene'na'. ⁷ Na' daa zeyidgake' chnabgakile'ne', na' bibe'shawee chi'e legake':

—Beena' bibi saaxyā Ɂhe' de, wak soloe' wtakwe'ne' yaja'.

⁸ Na'ch bizchekee chizzeje' lo yona'. ⁹ Na' ka goll Jesúza' legake' ka', na' biza' twej tweje', wzolozan ben' golka' na'tech ben' xkwid'ka', na' stoz noola' bgaan_ñlene' Jesúza'. ¹⁰ Na' bibe'shao' Jesúza' dii yoblə, na' chi'ene':

—Noolə, ¿garañ ben'ka' chao xya cho'? ¿Ani toe'
bibi beni li?

¹¹ Na' che' noola'ne':

—Ni toe', ben'do'.

Na'ch che' Jesúza'ne':

—Ni nad' bibi gonid' li'. Biyaj, na' bich wxinj
wleno'.

Jesúza' nsee beeni' che ben' yell-lioni

¹² Na'ch Jesúza' bizoloe' choe'lene' ben'ka' lle' na'
dill', chi'e:

—Nad' nak' beeni' che ben' yell-lioni. Beena'
 gone' nad' txen bich soe' lo yel chol che dii mala',
 san loo yichjlall'do'ena' gape' beeni' daa nsa' yel'
 mban zejli kanı.

¹³ Na'ch che' fariseoka'ne':

—Li' choe'zo' xtil' kwino', na' daa choe' xtil'
 kwino' bi nakan dii shajle'cho.

¹⁴ Na' che' Jesúza' legake':

—La'kzi choa' dill' che kwin', nezid' nakan dill' li,
la' nezid' gan zaa na' gan yiayaa. San le', aga nezile
 gan zaa, ni bi nezile gan yiayaa. ¹⁵ Le' chchoglole
che ben' lega ben' yell-lio. San nad' bi chchogloa'
che ben'. ¹⁶ Per shi nad' wchogloa' che ben',
 kon ka nakannan' wchogloa'n, la' aga tobia'lozaan
 chchogloa'n, san Xa'na', beena' bsel' nad', naknto'
 txen chchoglonto' che ben'. ¹⁷ Ley chelena' nan shi
chop ben' toz ka chitili xtilleeka' chiyal' shajle'cho
 chegake'. ¹⁸ Na' nak chopnto', nad' cho'a dill' che
 kwin', na' lekzka' Xa'na', beena' bsel' nad', cho'e dill'
cha'.

¹⁹ Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

²⁰ Jesúza' bi'e dill'ki shlak bli' bsedile' ben' latja' gana' chi' daa chgoogake' mech che yoodo'na', per ni to kono bex' le' daa bin' illin lla bin' illin gor gak che' daa llia bia'.

Jesúza' wne' kono gak yiyaj gana' yiyaje'

²¹ Na'ch Jesúza' wizi'e legake':

—Nad' yiyaa, na' yiyiljle nad', na' gana' yiyaa aga wak sa'le, la' lao saaxya cheleka' guetle.

²² Na'ch ben' wñabia' che ben' Israelka' che' ljwellgake':

—¿Acheenile' yiyit kwinen', lla? ¿Adaan naze': “Gana' yiyaa bi gak sa'le”?

²³ Na'ch che' Jesúza' legake':

—Le' nakle ben' yell-lio, na' nad' zaa yabana'. Le' chonle lega ben' yell-lio, san nad' bi chon' ka le' ben' yell-lio. ²⁴ Daan nia' le', guetle lao saaxya cheleka'. La' shi bi chajle'le nadaan nak' beena' ba wnja'nak', na' guetle lao saaxya cheleka'.

²⁵ Na'ch che'gake'ne':

—¿Norakzə li', shka'?

Na' che' Jesúza' legake':

—Nadaan nak' beena' ba wñiakz' le' dii nechte.

²⁶ Dii zan dii gak inia' dii gaogakan xya chele. Per beena' bsel' nad' cho'e dill' li, na' daa wne' nad' lennan' choe'len' ben' yell-lioni dill'.

²⁷ Na' legake' aga wyajni'gakile' shi xtill' Xe'nan' choe'lene' legake'. ²⁸ Na' daan chi'e legake':

—Kat' ba bda'le nad', Ben' Bsel' Chioza' Yellioni, to lee yag, kana'chan gakbe'ile nak' beena' ba wnja'nak'. Na' gakbe'ile aga ga de to dii ben' to bia'loz', san kon daa bsedi Xa'na' nad', lennan' cho'a

dill'. ²⁹ La' Xa'na', beena' bsel' nad', lekzen' zoalene' nad'. Bi chbej yichje' nad', la' toshiizi chon' ka chazlallee.

³⁰ Na' ka biyoll be' Jesúza' dill'ka', ben' zan benlilall'gake'ne'.

Ben'ka' chnabia' dii mala' yichjlall'do'eka'

³¹ Na'ch che' Jesúza' ben' Israelka' ba chajle' che': —Shi le' soachechle gonle ka ba wnia', dii li txenan ba nakle nad', shi naa. ³² Na' gombia'le dill' li cha'na', na' kat' ba nombia'len, gakle ka to ben' ba biyell bila' lao daa ntakw nchejan le'.

³³ Na'ch che'gake'ne': —Neto' naknto' xiin dia che dii Abrahama' na' axt naanlla aga non' inabia' neto' kwenche gonznto' kon daa ine'. ¿Berache nazo' yiye'll yila'nto'?

³⁴ Na' che' Jesúza' legake': —Dii li nia'le', nottez beena' chon dii mala' nake' ka ben' ndoo lawinna' daa chnabi'an le'. ³⁵ To wen llín aga toshiizi soe' lill xané'na', san xiin xan llinna', toshiizi soe' lill xe'na'. ³⁶ Na' shi nad', Xiin Chios, yisell yilaa le' lawi dii mala', dii li wiye'll wila'le lawinna'. ³⁷ Nezkid' nakle xiin dia che dii Abrahama', per cheenile witle nad' daa bi chleble cho'a xtillaani. ³⁸ Nad' cho'a dill' che daa ba ble'id' gana' zoa Xa'na', na' le', chonle ka na xalena'.

³⁹ Na' che'gake'ne': —Xiin dia che dii Abrahama' neto'. Na' Jesúza' chi'e legake': —Shel' nakle dowalj xiin dia che dii Abrahama', kon ka ben dii Abrahama' chonle, shel'ka'. ⁴⁰ La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahama' agaga bene' ka chonle. ⁴¹ Le' chonle kon ka chon xalena'.

Na'ch che'gake'ne':

—Aga naknto' ka to ben' bi wyoo xayin. Toz Chioza' nake' Xanto'.

42 Na'ch che' Jesúza' legake':

—Shel' lekzile Chioza' nake' Xale, wakile nad' shel'ka', la' kwite'nan' wzaa. Aga tobia'lozaan bid', san Chiozan' bselee nad'. **43** Na' aga chajniile diika' nia' le' daa bi cheenile wzenagle dill'ka' cho'a. **44** Dii xiwaan nak xale na' chibaile chorle daa chaklalliin. La' kana'te dii xiwaa nakan to wen xya, na' ni shlin bin' gonan daa nak shli, ni bi choe'n dill' li. Kat' chziye'n chonan kon ka nan loo lall'do'inna', la' nakan liizelozi dii wxiye' na' nakten xan yel' wxiye'na'. **45** Na' nad', daa cho'a dill' lina' aga chajle'le cha'. **46** Ni tole bi gak wli'le shi de saaxya cha'. Na' shi cho'a dill' li, ḡberache bi chajle'le cha'? **47** Beena' nak xiin Chioza' chzenague' xtilleena'. Na' le', bi chzenaglen daa bi nakle xiine'.

Ba zoakz Crístona' kana' zi' galj dii Abraham'a'

48 Na'ch ben' wñabia' che ben' Israelka' che'gake'ne':

—Aga naznto' nanto' nako' ben' Samaria na' yootio' to dii xiw'!

49 Na' che' Jesúza' legake':

—Aga no dii xiw' yo'a, san Xa'nan' chgwaa balaan, per le', chñit chdele nad'. **50** Aga chyilj' koo ben' nad' balaan. San zoa beena' cheeni sho'a balaan, na' len' chchogloe' che ben' kon ka nakan. **51** Dii li nia' le', beena' chon ka nia', ibane' zejli kanj.

52 Na'ch ben' wñabia' che ben' Israelka' che'gake'ne':

—Naach ba wñezinto' dii xiw'kzan yoo. Dii xozxto'cho Abrahama' wite' na' lekzka' yog' ben'ka' wdixjee daa goll Chioza' legake' kani'yi. Na' li' naa, nazo': "Beena' chzenag cha' ibane' zejli kaní." 53 ¿Achakilo' zak'cho' aga ka dii xozxto'cho Abrahama'? Le' wite' na' ka'kzə dii ben'ka' wdixjee daa goll Chioza' legake' kani'yi. ¿Noraka chakzi kwino'?

54 Na'ch che' Jesúza' legake':

—Shel' nadaan chgwaa kwin' balaan aga bi zakiin, shel'ka'. Per Xa'na', beena' nale nake' Chios chele, len' chgwée nad' balaan. 55 La'kzi bi nombia'lene', nad' nombi'ane'. Shel'ka' nia' bi nombi'ane', na' nak' ka le' ben' wxiye'. Per nombi'ane' na' chon' ka ne'. 56 Dii xozxto'cho Abrahama' bibaile' daa wñezile' ile'ile' llaki zoa' yell-lioni. Na' ba ble'ile'n ná' bibaile'.

57 Na'ch ben'ka' chñabia' ben' Israelka' che'gake'ne':

—Ni shiyon yiz bin' gakilo' na' nazo' zle'ilo' dii Abrahama'.

58 Na'ch che' Jesúza' legake':

—Dii li nia' le', kana' zi' galje dii Abrahama', bakz zoa' nad'.

59 Na'ch lii wdoyatogake' yaja' nan wtakwgake'ne'n, per lii bkwash'tie' na' bizee gana' zoa yoodo'na'. Na' ni bi gokbe'gakile' bidie' ladje'ka' ziylaje'.

9

Biyon Jesúza' to ben' lchol

1 Ka zej Jesúza' na' ble'ile' to ben' byo ben' golje' ncholle'. **2** Na' ben'ka' nakgake'ne' txen che'gake'ne':

—Maestro, ¿berache golj beeni nchhole', lla?
 ¿Anchhole' ni che saaxyä che'na', anti ni che saaxyä
 che xaxneekan', lla?

³ Na' che' Jesúza' legake':

—Aga ni che saaxyä che'nan' ni aga ni che
 saaxyä che xaxneekan', san kwenche wli'lawi yel'
 wak che Chioza' lo yel' mban che'nan' nake' ka'.

⁴ Shlak naa ni de latj, chiyal' goncho xshin beena'
 bsel' nad'. La' wllin lla kat' kochno bi gak gon.

⁵ Shlak ni zoa' yell-lioni nak' beeni' che ben' yell-
 lioni.

⁶ Na' ka biyoll wna Jesúza' ka', na'ch blle'
 xeneena' lo yona' na' bene' lat' benj kon xeneena',
 na'ch wdebe'n jalao ben' lchola'. ⁷ Na' chi'ene':

—Wyaj jadib jalawo'na' cho'a tanga' daa le Siloé
 —na' Siloé zejin Ben' Nselee.

Na'ch wyaj ben' lchola' jadib jalawe'na', na' ka
 bizee na', ba chle'ile'. ⁸ Na'ch ben' wlill che'ka' na'
 ben'ka' ble'gakile'ne' kana' nchhole' che'gake':

—¿Aaga beenin chbi'e chnabe' mecha'?

⁹ Na' bale' che':

—Awe, len'.

Na' zi bale' che':

—Aga len', per ka'tekzə nake'.

Na' beena' chi'e:

—Nad'kzan'.

¹⁰ Na'ch wñabgakile'ne':

—¿Nakra gok ba chle'ilo'?

¹¹ Na' chi'e legake':

—To ben' le Jesús bene' benja' na' wdebe'n
 jalaw'ki na'ch wne' nad': “Wyaj gana' llia tanga'
 daa le Siloé na' jadib jalawo'na'.” Na'ch wyaa na'
 ka biyiba'n, na' gok ble'id'.

¹² Na'ch che'gake'ne':

—¿Garan beena' no' ka'?
 Na' chi'e legake':
 —Bi nezid'.

Wnabyolli fariseoka' nak gok ble'i ben' lchola'

¹³ Na'ch jwa'gake' beena' gok ben' lchol lao fariseoka'. ¹⁴ Na' llana' wdeb Jesúza' benja' jalao beena' kwenche ble'ile' nakan lla chombaangake'. ¹⁵ Na'ch fariseoka' lekzka' wñabgakile'ne' nak gok chle'ile'. Na' chi'e legake':

—Beena' biyone' nad' wdebe' benja' jalaw'ki, na' ka biyiba'n gok ble'id'.

¹⁶ Na'ch bal fariseoka' che'gake':

—Aga Chiozan' bselee beena', la' chone' daa bi chiyal' goncho llani chombaancho.

Na' zi bale' che'gake':

—¿Nakra gon to ben' saaxyta gone' yel' wak ka diiki chon beeni?

Na'ch gokgake' choplə. ¹⁷ Na'ch dii yoblə goll-gake' beena' gok ben' lchol:

—¿Shera li'? ¿Bi ino' che beena' ben ka chle'ilo'?

Na' chi'e legake':

—Nad' nia' nake' to ben' chyixjee daa che' Chioza'ne'.

¹⁸ Na' ben'ka' chnabia' ben' Israelka' bi wyajle'gake' shi dii li gok beena' ben' lchol na' naa ba chle'ile'. Na'ch goxgake' xaxneena', ¹⁹ na' wñabgakile' legake':

—¿Abeenin xiinlena', beena' nale nchole' ka golje'? Na' ¿nakra gok ba chle'ile' naa, shka'?

²⁰ Na' xaxneena' billiigake' xtilleeka':

—Nezinto' beenin xiinnto'na' na' golje' nchole'.

²¹ Per aga nezinto' nak gok chle'ile' naa, ni bi nezinto'

non biyon le'. Li inabile', la' aga nake' bi'do' inacho
bi gak ine' non biyon le'.

²² Goll xaxneena' ka' daa chllebgake' ben'ka'
chnabia' ben' Israelka', la' ba bgaangake' dill' not-
teza ben' ine' Jesúza' nake' Crístona' bi wlebgake'ne'
gana' chdop chllaggake' choe'lwillgake' Chioza'.
²³ Daan gollteza xaxneena': "Li inabile', la' aga nake'
bi'do' inacho bi gak ine' non biyon le'".

²⁴ Na'ch dii yobla goxgake' beena' gok ben' lchol,
che'gake'ne':

—Bzoashki Chioza' de taschiw shi leilo' choo
dill'li, la' nezinto' beena' biyon li' nake' ben' saaxya.

²⁵ Na'ch golle' legake':

—Bi nezid' shi nak beena' ben' saaxya. Lete dii
nezid', golj' nchol' na' naa ba chle'id'.

²⁶ Na'ch che'gake'ne':

—¿Beran benile' li'? ¿Nak bene' kwenche
chle'ilo'?

²⁷ Na' chi'e legake':

—Ba wniakz' le', na' bi chzi'le cho'a xtillaana'.
¿Biche cheenzile inia'n dii yobla? ¿Anti lekzka' lenle
ba cheenile gonlene' txen?

²⁸ Na'ch wnegake'ne' zibia', che'gake'ne':

—Lin' nako' beena' txen, san neto' Moisézan'
naknto' txen. ²⁹ Nezinto' Chioza' wnie' Moiséza',
san beena', ni bi nezinto' ga zee.

³⁰ Na'ch beena' gok ben' lchol chi'e legake':

—¡Nakkzan dii yibanicho daa bi nezile ga za'
beena' na' ba bene' ka chle'id'! ³¹ Nezkzicho
aga chzenag Chioza' che ben' saaxyaka', san
chzenague' che ben'ka' choe'la'ogake'ne' na' chon-
gake' daa chazlallee. ³² Dezd ka wxe wzil yell-lioni
bin' yenicho shi zoa ben' chak chone' ka chle'i to

ben' golje' nchole'. ³³ Shel' beeni bi nake' to ben'
bsel' Chioza', ni to yel' wak bi gak gone', shel'ka'.

³⁴ Na'ch che'gake'ne':

—Dezd ka goljo' nako' ben' saaxyaa. ¿Ana' chak-
ilo' wli' wsedilo' neto'?

Na'ch bibejgake'ne' ladje'ka'.

Ben'ka' nchol nniti yichjlall'do'eka'

³⁵ Na' wnezí Jesúza' bibej fariseoka' beena' gok
ben' lchol' ladje'ka', na' ka billague'ne' na'ch
chi'ene':

—¿Achonlilalloo Beena' Bsel' Chioza' Yell-lioni?

³⁶ Na' beena' chi'ene':

—Ben'do', wnashki nad' nora beena' kwenche
gonlilallaane'.

³⁷ Na' che' Jesúza'ne':

—Ba ble'kzilo'ne', na' lekzen' chshaljleno' ñaa.

³⁸ Na'ch lii bchek'te xibe'na' lao Jesúza', na'
chi'ene':

—Chonlilalla li', Xan' —na'ch be'laweene'.

³⁹ Na'ch che' Jesúza':

—Ba bid' yell-lioni kwenche wchogloa' che ben'
yell-lioni. Zaa kwenche ben'ka' nak ka ben'
lchol' ile'gakile', na' ben'ka' chakgakile' chle'gakile'
iyakgake' ka ben' lchol'.

⁴⁰ Na'ch balch fariseoka' lle' na', ka bengakile' chi'e
ka', che'gake'ne':

—¿Achakilo' lennton' naknto' ben' lchol?

⁴¹ Na'ch che' Jesúza' legake':

—Shel'nakle ben' lchol, aga bi xtol'le de, shel'ka'.
Per daa nale chle'ile, daan de xtol'le.

10

Jempl che leej che xil'ka'

¹ 'Dii li nia' le', beena' bi choo cho'a leej che xil'ka' san chiyiljalilee cho'e gan yoblə, beenan' ben' wbanna'. ² San beena' choo cho'a leeja', len' ngoo lall' nee chape' legakb. ³ Na' beena' chap cho'a leej chebka' chsalje'n kwenche cho'e, na' xil'ka' lii chiyombia'tegakb shi'ena'. Na' cho'e le to tob na' chbeje' legakb loo leej chebka'. ⁴ Na' chde chbeje' yog' xil' che'na' na'ch chbialoe' laobka'. Na' xil'ka' xochi chjanogakb le' daa nombia'gakb shi'ena'. ⁵ Aga willjanogakb ben' yoblə, san wxonjdogakib le' daa bi nombia'gakb shi'ena'.

⁶ Bzoa Jesúza' jempli kwenche bzajniile' ben'ka'. Per legake' aga wyajni'gakile' bin zeji daa golle' legake'.

Jesúza' chapshi'e cho' ka ben' chapshi'e xil' che'

⁷ Na'ch chize' Jesúza' legake:

—Dii li nia' le': Nad' nak' ka cho'a leej che xil'ka'.

⁸ Yog' ben'ka' bid kana' bin' yid', nakgake' ka ben' wban. Na' ben'ka' nia' nakgake' xil' cha' bi bzenag-gake' chegake'. ⁹ Nad' nak' ka cho'a leej che xil'ka', na' beena' gonlilallee nad' bi kwiayee, san gake' ka xilaa, bana' mbalaz choob na' chchejb cho'a leej cheba' na' chllelib dii cheej chaob.

¹⁰ 'Ka nak wbanna', za'ze' kwenche kwane' na' wite' na' wlliayee legake'. San nad', zaa kwenche wi'a to yel' mban shao' chegake', na' soagake' mbalaz. ¹¹ Nad' nak' ka to ben' chapshi'e xil' che'na', beena' axt chzani yel' mban che'na' ni che xil'do'ka' nape'. ¹² San beena' chap xil'ka' ni che mba laxje'na', ka chle'ile' ba za' to ba znia gaob xil'ka', lii chchoonlall'tie'gakb na' chxonj'e' daa bi nakgakb ba che'. Na'ch chllin ba zniana'

chox'b xil'ka' na' chsheshlesb legakb. ¹³ Beena' chzi' laxje'na' chxonjtezile' xil'ka', la' daa ikaaz laxje'nan' chibaile', na' bi chakile' legakb.

¹⁴ 'Nad' nak' ka to ben' chapshi' xil'do'. Na' ben'ka' chonlilall'gake' nad' nakgake' ka xil'do' cha'. Nad' nombi'a legake' na' legake' lekzka' nombia'gake' nad'. ¹⁵ Ka chak che Xa'na' nombi'e nad', na' nad' nombi'ane', ka'kzan nad' nombi'a legake', na' chzanid' yel' mban cha'ni ni chegake'. ¹⁶ Na' lekzka' zoach ben' yoblə, ben' zi' gonlilall' nad', na' lekzka' nakgake' ka xil' cha', per bin' gakgake' txen xil' cha'ka'. Na' chiyal' gaxgakee kwenche wzenaggake' cha', na' yog'gake' gakgake' tozə, na' toz nad' gak lall' na'gake'.

¹⁷ 'Chaki Xa'na' nad' daa chzanid' yel' mban cha'ni witgake' nad', na'tech yiban' sto shii. ¹⁸ Ni to kono yikaa yel' mban cha'ni, san kwinkza'n wi'an. Nap' yel' wñabia' kwenche wi'a yel' mban cha'ni witgake' nad', na' lekzka' nap' yel' wñabia' kwenche yiban'. La' kan' nllia Xa'na' bia' gon'.

¹⁹ Na'ch dii yoblə ben' Israelka' lle' na' gokgake' choplə ka bengakile' daa wne'. ²⁰ Zane' che'gake':

—¿Bihe chzenagzle che beena'? Dii xiwaan yo'e, na' chaktonte'n.

²¹ Na' zi bale' che'gake':

—Aga choe' beeni dill' ka ben' yoo dii xiw', la' aga bi yel' wak nap dii xiwaan yiyanan to ben' lchol.

Ben'ka' chñabia' ben' Israelka' bi bzenaggake' che Jesúza'

²² Na' do kana', gol' lnina' Jerusalénna' daa chisa'lall'gake' llana' bengake' lall' na' Chioza' yoodo'na', na' nak beo' zag. ²³ Na' chda Jesúza'

loo koridor che dii Salomónna' daa ze kwit yoodo'na'. ²⁴ Na' ben'ka' chnabia' ben' Israelka' wyechjyobgake'ne', che'gake'ne':

—¿Axt batrakzə yikwaso' yel' chakchoplall' chento'ni? Shi li'kzan Crítona', beena' chbeznto' wsel' Chioza', lla wnatega neto' kwenche inezinto'.

²⁵ Na' che' Jesúza' legake':

—Ba wniakz' le' kan', na' bi chajle'le. Yel' wakka' chon', chonlena'n yel' wnabia' che Xa'na', na' chli'n nan len' bselee nad'. ²⁶ Na' le', bi chajle'le daa bi nakle txen ben'ka' nia' nakgake' xil' cha'. ²⁷ Nombi'a ben'ka' nia' nakgake' xil' cha', na' legake' chzenaggake' xtillaana' na' nogake' nad'. ²⁸ Na' cho'a legake' yel' mban zejli kanı, na' bi kwiayi'gake'. Na' ni to kono gak yibej legake' lo ni'a na'ni. ²⁹ Xa'na' ba bene' legake' lall' na' gapshiigakee, na' len' chnabia'che' lao nottez. Na' ni to kono gak yikwas legake' lo ni'a neena'. ³⁰ Ka Xa'na'kz, nad'.

³¹ Na'ch ben' Israelka' bizgoyogake' yaja' kwenche nan wtakwgake'n Jesúza'. ³² Na' chi'e legake':

—Dii zan dii wen ba ble'ile chonlen' yel' wak che Xa'na'. Na' ¿nonnan' bi choolall'le daa cheenile' wtakwle nad' yaja'?

³³ Na' ben'ka' chnabia' ben' Israelka' che'gake'ne':

—Aga ni che dii wenka' ba benon' cheeninto' wtakwnto' li' yaja', san daa chonz kwino' ka Chiozan', la' ben'zə li'.

³⁴ Na'ch che' Jesúza' legake':

—Ley chelena' nan, Chioza' ne': “Nad' wnia' le' nakle chios.” ³⁵ Cho'a Xtil' Chioza' toshiizi nakan ka wne', na' shi cho'en dill' bsi'e “chios” ben'ka'

wdixjee xtilleena', ³⁶ ḡbiche nazle nad' chnia' che Xacho Chioza' daa nia' nak' Xiiñe', len len' wleje' nad' na' bselee nad' yell-lioni? ³⁷ Shi bi chon' ka chon Xa'na', aga wyajle'le Ɂha'. ³⁸ Na' shi chle'ile chon' ka diika' chon Xa'na', li shajle' che diika' chon', la'kzi bi cheenile shaſle'le Ɂha', kwenche inezyen'ile Xa'na' zoalene' nad' na' nad' zoalenee.

³⁹ Na'ch dii yoblə goklall'gake' gox'gake'ne' na' bene' gan bile' lawe'ka'.

⁴⁰ Na'ch bizyaj Jesúza' dii yoblə shlaa yao Jordánna' jazoe' latja' gana' bchoa Juanna' ben'ka' nisa' kana'. ⁴¹ Na' ben' zan wyajgake' gana' zoe' na' che'gake':

—La'kzi bibi yel' wak bli' Juanna', yog' diika' wne' che beeni nakan dii li.

⁴² Na' ben' zan wyajle'gake' che Jesúza' na'.

11

Wit Lázarona'

¹ Yell Betániana' wzoa to ben' bi shao' wlie' Lázaro, na' lekzka' na' wzoa ben' zane'ka' Mariana' len Mártna'. ² Mariana', ben' zan Lázarona', len' bwazje' set zixa' ni'a Xancho Jesúza' na' bisbillile'n yish' yichje'na'. ³ Na' chop bilte ben' zan Lázarona' bsel'gake' rson lao Jesúza' che'gake'ne':

—Xan', bi shao' ben' zannto'ni, beeni nllaguilo'.

⁴ Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lekzka' nad', nak' Xiiñe', sho'a balaan.

⁵ La'kzi Jesúza' chakchgaile' Mártna', na' ben' bile'na' na' Lázarona', ⁶ ka benile' rson bi shao'

Lázarona', wllachile' zi chop lla gana' zoe'. ⁷ Na' ka wde, chi'e beñ'ka' nakgake'ne' txen:

—Li sho' Judeana' sto shii.

⁸ Na'ch beñ'ka' nakgake'ne' txen che'gake'ne':

—Maestro, kani batchgana' goklallii beñ' Israelka' lle' na' witgake' li' kon yaja'. ¿Ana' cheenilo' yizajo' na'?

⁹ Na' che' Jesúza' legake':

—¿Aaga shlliñ goran' de beeni'na' shlla? Na' beena' chda tellalə aga willjachewee daa de beeni'na' yell-lioni. ¹⁰ San shi chde' wal-lə, willjachewee daa bi nla'.

¹¹ Na'tech golle' legake':

—Ba ches Lázarona', beena' nllaguicho, na' sha' lljasbanee.

¹² Na'ch che' beñ'ka' nakgake'ne' txen:

—Xan', shi ba chese', wiyakshao'lall'kzile'.

¹³ Jesúza' golle' ka' daa nezile' ba wit Lázarona', na' legake' chakgakile' daa cheszen' golle' ka'. ¹⁴ Na'ch be'len Jesúza' legake' dill' ka to shajni'gakile', chi'e:

—Ba wit Lázarona'. ¹⁵ Na' chibaid' bi wzoa', la' chyalljch gon' ka shajle'chle cha'. Li sho' shajcho gana' die'.

¹⁶ Na'ch Tomáza', beena' che'gake' Dídimo*, chi'e beñ'ka' sto:

—Li sho'lene' kwenche lencho guetlenschone' shi witgake'ne'.

Jesúza' chakyisbane' beñ' wetka'

¹⁷ Na' ka bllingake' yell'a', na' che'gake'ne' ba gok tap lla bgash' Lázarona'. ¹⁸ Na' Betániana' llian gaozə Jerusalénnna', ka do shon kilómetro nlaagakan.

* **11:16**

19 Na' ben' zan ben' Israelka' lle' Jerusalénna' wya-jgake' jenxenlall'gake' Mártana' len Maríana' daa wit ben' zane'ka'. **20** Na' ka wnezi Mártana' ba zoa illin Jesúza', na'ch jatile'ne', per Maríana' bigaané' lille'ka'. **21** Na' ka blline' kwite'na', chi'ene':

—Xan', shel' zo' ni kana' wlen yellwe' che ben' zan'na' bi wite', shel'ka'. **22** Na' naa la'kzi ba wite', nezid' gon Chioza' bittezə dii inqabilo'ne'.

23 Na' che' Jesúza'ne':

—Wiban ben' zano'na'.

24 Na'ch che' Mártana':

—Awe, nezid' wibane' kat' yiban ben' wetka' llana' te che yell-lioni.

25 Na' che' Jesúza'ne':

—Nad' chon' ka chiban ben' wetka' na' nap' yel' mban dii bi te cheyin. Beena' chonlilallee nad', la'kzi ba wite', wibanchkze'. **26** Na' yog' ben'ka' mban na' chonlilall'gake' nad' bi guetgake' toshiizi. ¿Achajli'o dga nia' li?

27 Na' che' Mártana'ne':

—Awe, Xan', chajli'a lin' nako' Crítona', na' lin' Xiñ Chioza', beena' llia bia' yid yell-lioni.

Wchell Jesúza' gana' bkwash'gake' Lázarona'

28 Na' biyoll wna Mártana' ka', na'ch ziyaje' zjanie' ben' bile' Maríana', na' chi'ene' xochizi:

—Ba bid Maestrona' chñie' li'.

29 Na' kon ka golle' Maríana' ka', lii wzolla'tie' jawie' Jesúza'. **30** Bilan' sho' Jesúza' yella', ni zetie' gana' jatil Mártana'ne'. **31** Na' ben' Israelka', ben'ka' chonxenlall'gake' Maríana' lille'na', ka ble'gakile' wzollee na' zejdoe', na'ch zjanogake'ne' chakgak-ile' lljchelle' cho'a banan'.

³² Na' ka bllin Maríana' kwit Jesúza', lii b̄chek'te xibe'na' lawe'na' chi'ene':

—Xan', shel' zoasho' ni, bi wit ben' zan'na', shel'ka'.

³³ Na' ka ble'i Jesúza' chbell Maríana', na' ka'kzə ben'ka' zejlengake'ne', na' to dii wal inlleb gokile'.

³⁴ Na' chi'e legake':

—¿Gara jakwash'lene'?

Na'ch che'gake'ne':

—Sho' lljawiacho gana' die', Xan'.

³⁵ Na' wchell Jesúza'. ³⁶ Na'ch che' ljwell ben' Israelka' lle' na':

—Li wwia ka gokchgaile'ne'.

³⁷ Na'ch bale' che'gake':

—Beeni bene' ka ble'i ben' lchola', ¿Aaga zak bisle' Lázarona', na' bi wite' shel'ka', lla?

Bisban Jesúza' Lázarona' ladj ben' wetka'

³⁸ Na'ch Jesúza' wizakile' dii wal ka bllingake' cho'a bana'. Na' bana' nakan to blej, na' chi' to yaj nkwascha'n cho'ayinna'. ³⁹ Na'ch che' Jesúza':

—Li yikwas yaja' ka'lə.

Na' Mártna', ben' zan ben' weta', chi'ene':

—Xan', ba chla' beena' zban, la' ba gok tap lla wite'.

⁴⁰ Na' che' Jesúza'ne':

—¿Aaga ba wnia'li' shi shajli'o, na' ile'ilo' yel' wak choo yel' wak xen che Chioza'?

⁴¹ Na'ch bikwasgake' yaja' cho'a bana' gana' die'. Na' blis jalao Jesúza' yabana', na' chi'e:

—Xa, choxkeno' ba bzenago' cha'. ⁴² Nezid' toshizi chzenago' cha', per chnia' li' kwenche shajle' ben'ki lle' ni nan lin' bseloo nad'.

⁴³ Na' ka biyoll wne' ka', na'ch wñie' zillj, chi'e:

—¡Lázaro, bichej na'!

⁴⁴ Na' lii bichejte Lázarona' ndob ni'a neena' lech'ka', na' cho'alawe'na' ndoban to lech'. Na'ch che' Jesúza' legake':

—Li yizeshe' lechaa na' li yisane' yiyaje'.

Wloogake' xnezin gox'gake' Jesúza'

(Mt 26:1-5; Mr. 14:1-2; Lc 22:1-2)

⁴⁵ Na' zan ben' Israelka', ben'ka' jen Mariana' txen daa wit ben' zane'na', ble'gakile' ka ben Jesúza' na' benlilall'gake'ne'. ⁴⁶ Per bale' wyaj lao fariseoka' na' jellgake' legake' ka ben Jesúza'. ⁴⁷ Na'ch bxozka' chnabia' na' fariseoka' bitopgake' yog' ben'ka' chnabia' ben' Israelka', na' che'gake':

—¿Nakraz ka gonchon, lla? La' zan yel' wak chli' beeni. ⁴⁸ Na' shi inacho jwayi beena', yog'z ben' gonlilall'gake'ne' na'ch yid ben' Rómaka' na' wliayi'gake' yoodo' chechoni len yell chechoni.

⁴⁹ Na'len to ben' le' Caifás, nake' bxoz choo bxoz xen ka lo yiza'. Na' chi'e legake':

—Bi nezzilen, ⁵⁰ ni bi chakbe'ile wenlan toz ben' guet ni che ben' wlall chechoka', aga ka daa kwiayi' doxen lallchoni.

⁵¹ Na' aga kon ka wnaz Caifáza' kan', san daa nake' bxoz choo bxoz xen lo yizan', ben Chioza' ka bi'e dill' guet Jesúza' ni che ben' Israelka'. ⁵² Na' aga ni che toz ben' Israelkan' guet Jesúza', san lekzka' ni che yog' ben'ka' ba wleje' gakgake' xiine' doxen yell-lionin, kwenche gakgake' toz. ⁵³ Na' daa goll Caifáza' ka', lo llana' wzolo bengake' toz dill' kwenche witgake' Jesúza'.

⁵⁴ Na' daa wzolo chongake' ka', aga wdatekch Jesúza' ladj ben' Israelka', san wzee wyaje' to yell

dii le Efraín, daa llia gaozə latja' gana' bibi chashj ch̄leb, na' na'z wzoe' len ben̄'ka' nakgake'ne' txen.

⁵⁵ Na' ba zoa gao gal̄ lñi Paskw che ben̄' Israelka', na' ben̄' zan ben̄' yell yoblə wyajgake' Jerusalénna' ka zi' gal̄ lñina' kwenche yixi yiyechgake' ka nllia leya' bia'. ⁵⁶ Na' chdagake' chiyiljgake' Jesúza', na' shlak lle'gake' lesh' chyoodo'na', chñabi ljwelle':

—¿Beraka chakile? ¿Awide' lñina', lla?

⁵⁷ Na' bxozka' chñabia' len fariseoka' bengake' mandad shi no nezi ga chda Jesúza' do na' lljell-gake' legake' ka' kwenche gox'gake'ne'.

12

Bwazj Maríana' set zixa' ni'a Jesúza'

(Mt 26:6-13; Mr. 14:3-9)

¹ Zi' xop lla gal̄ lñi Paskwa' wyaj Jesúza' yell Betániana', gana' zoa Lázarona', beena' bisbane' ladž ben̄' wetka'. ² Na' ben̄'ka' lle' Betániana' bsini'agake' to xshe' che Jesúza', na' Mártana' bdie' yel' wawa'. Na' Lázarona' wche'lene' Jesúza' cho'a mesa' na' nochlə ben̄'ka' wdaolengake'ne'. ³ Na'ch bex' Maríana' ka do gashj litr set zixa' daa le nardo, daa le zak'chga, na' bwazje'n ni'a Jesúza', na' tech bisbillile'n yish' yichje'na'. Na' doxen loo yoona' wche' shii set zixa'. ⁴ Na' len Jud Scariota', beena' nak Jesúza' txen, beena' gone'ne' lo na' ben̄' malka'. Na' golle':

⁵ —¿Berache bi betee set zixa' na' wi'e mecha' gaklenan ben̄' yesh'ka', lla? Len la' ka che twiz laxj beñaan zakaan.

⁶ Juda' wne' ka' aga inacho daa chiyeshile' ben̄' yesh'kan', san daa nake' to ben̄' wbanan. La' len'

gok lall' nee xmeche'ka' na' chbane' lat' wejan.

⁷ Na'ch che' Jesúza'ne':

—Bi wllono' gone' ka'. Ba nzoashao'kze' daa kwenche wgone'n llin kat'ka' wkwash'gake' nad'.

⁸ Ka nak ben' yesh'ka', toshiizin soakz ben'ka' lad-jleni, san nad', aga toshiizin soalen' le'.

Wloogake' xñezin witgake' Lázarona'

⁹ Na' zan ben' Israelka' wñezgakile' zoa Jesúza' yell Betáiana' na' wyajgake' na'. Per aga wyajgake' yella' ni che toz Jesúzan', san lekzka' kwenche ile'gakile' Lázarona', beena' bisban Jesúza' ladj ben' wetka'. ¹⁰ Na'ch bxozka' chñabia' bengake' toz dill' witgake' len Lázarona'. ¹¹ La' daa biban Lázarona' ladj ben' wetka', zan ben' Israelka' benlilall'gake' Jesúza' na' bich bzenaggake' che bxozka'.

Ka biyoo Jesúza' Jerusalénna'

(Mt. 21:1-11; Mr. 11:1-11; Lc. 19:28-40)

¹² Na' betiyo ben' be ben' zil, ben'ka' lle' yell Jerusalénna' daa chal' lñi Paskwa', wñezgakile' ba ngoo Jesúza' nez yilline' yella'. ¹³ Na'ch wyajgake' jlezzake'ne' nox'gake' zinka', na' choe'la'ogake'ne', nagake':

—¡Li we'la'o Chioza! ¡Gonleeyshga Xancho Chioza' beeni ba bselee inabi'e cho' ben' Israel!

¹⁴ Na' blleli Jesúza' to burr chbando' na' wllie'b. Na' gok kon ka na Cho'a Xtil' Chioza', gana' na:

¹⁵ Le' ben' yell Jerusalén, bi illeble.

Li wwia, ni ba za' beena' inabia' le'
na' llie' to burr chbando'.

¹⁶ Na' ben'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj ben' wetka', kana'ch gokbe'gakile' nan Cho'a

Xtill' Chioza' daa bzej ben'ka' kani'yi choe'n dill' che', na' che diika' bengakile'ne'.

¹⁷ Na' ben'ka' lle'len Jesúza' kana' bisbane' Lázaronaladj ben' wetka', ben'ka' bengakile' binie'ne' kwenche bicheje' loo bana', legaken' be'gake' dill' daa bene'. ¹⁸ Daan ben' zan jatilgake' Jesúza' daa bengakile' ka nak yel' waka' bene'. ¹⁹ Na'ch fariseoka' che' lwellgake':

—Li wwia ka ba chak, bibi de goncho. Li wwia, yog'lolzə ben' ba nogake' le'.

Bal ben' griegoka' chiyilgake' Jesúza'

²⁰ Ladj ben'ka' wyaj lnina' Jerusalénna' je'la'ogake' Chioza' na' len bal ben' griego. ²¹ Na' ben'ki jabig'gake' gana' ze Felípena', beena' nak ben' yell Betsaida daa llia yell-llo daa mban Galileana', na' che'gake'ne':

—Ben'do', cheeninto' we'lennto' Jesúza' dill'.

²² Na' Felípena' jelle' Andréza' ka', na' choptie' wyajgake' jellgake' Jesúza' ka'. ²³ Na'ch che' Jesúza' legake':

—Ba bllin lla, nad', Ben' Bsel' Chioza' Yell-lioni, sho'a balaan xenna'. ²⁴ Dii li nia' le', shi to biŋ che trígona' bi igasha'n loo yona', ka'chokzə kwe'n. Per shi igasha'n loo yona', na' yila'n na' yiyanan dii zan wal. ²⁵ Beena' ze wneyi che yel' mban che'na' yell-lioni, len' kwaiyee. San beena' chzani yel' mban che'na' bittezə dii gak che', beenan' gat' yel' mban che' zejli kanı. ²⁶ Nottezə ben' cheenile' gone' xshin'na' chiyal' gone' nad' txen. Na' gana' soa', na'kzə soe'. Na' beena' gon xshin'na', Xa'na' kwee le' balaan.

Wdixjee Jesúza' witgake'ne'

²⁷ 'Naatek chakyeshid' dii wal inlleb. *¿Awñabid'*
Xa'na' yisle' nad' lawi dga wtil', lla? Bi gak gon' ka',
la' ni cheyi dgayen'kzan bid'. ²⁸ Na'ch golle':

—Xa, benshki ka shoo balaan.

Na'ch wne Chioza' yabana', chi'e:

—Ba ben' kwenche wyo'a balaan, na' naa gon' ka
 sho'a balaan sto shii.

²⁹ Na' ben'ka' lle' na' bengakile' shii Chioza', na'
 bale' wnagake' wziwa'zan wne. Na' zi bale' wna to
 anjlan' ba wnie' le'.

³⁰ Na'ch Jesúza' chi'e legake':

—Aga ni cha' nadaan wne Chioza', san ni che
 len'. ³¹ Na' ba bllin lla gone' yel' joschis che
 yog' ben' lle' yell-lioni, na' naa kweje' dii xiwaa
 daa chnabia' yell-lioni. ³² Na' kat'ka' wlisgake'
 yaga' cha'lə gana' nda'gake' nad', kanan' gat' latj
 gonlilall' nottezə ben' nad'.

³³ Na' daa wne' ka', bzajniile' legake' nakan
 guete'. ³⁴ Na' ben'ka' lle' na' che'gake'ne':

—Ba beninto' chlabgake' Cho'a Xtil' Chioza'
 gana' nan Crítona', beena' wsel' Chioza' inabi'e,
 soe' zejli kañi. Na' ¿biçhe nazo' Beena' Bsel' Chioza'
 Yell-lioni wlisgake'ne' cha'lə wwia ben' le' lee yaga'
 gana' dee? ¿Nora Beena' Bsel' Chioza' Yell-lioni no'
 ka'?

³⁵ Na'ch che' Jesúza' legake':

—Nad' nak' beeni' che ben' yell-lioni, per zi
 shlollchga soalen' le'. Li sho' lo nez lina' shlak ni
 de beeni'na' kwenche bi gak chele ka chak che to
 ben' chañile' kat' ngwee' nez. La' beena' chda' gana'
 shchol bi nezile' galan zeje'. ³⁶ Li gonlilall' nad' naa
 shlak ni zoalen' le' kwenche sho' beeni' cha'na' loo
 yiçhjlall'do'lena'.

Biyoll wna Jesúza' ka' na'ch bizee jakwashi'le' legake'.

Ben' zan ben' Israelka' bi wyajle'gake' che Jesúza'

³⁷ La'kzi ben' Israelka' ble'gakile' yel' wak zan daa ben Jesúza', zangake' bi benlilall'gake'ne'. ³⁸ Na' daa bengake' ka', gok ka wna dii Isaíaza', beena' wdixjee daa goll Chioza'ne' kani'yí, daa wne':

Xan' ḥazoa ben' ba wyajli'e dillaa chyixje'nto'?

Na' ḥazoa ben' ba gokbe'ile' bli'o yel' wak ḥcho'na'?

³⁹ Na' bi wyajle'gake', la' Chioza' bene' ḥegake' ka na sto dii bzej dii Isaíaza':

⁴⁰ Bene' legake' ka ben' lchol na' lall'do' ḥeçç
kwenche bi gakbe'gakile' bi zejin diika'
chle'gakile',

ni bi shajni'gakile' diika' chengakile',

kwenche ki yiijay yilengakile' na' yiyone' legake'
ben' wen.

⁴¹ Wna Isaíaza' ka' daa ble'ile' ka nak balaan xen wala' nap Jesúza', na' bi'e dill' che'.

⁴² Na' la'kzi ka', ben' zan ben' Israelka' lente no ben' wñabia' che'ka' benlilall'gake' Jesúza'. Per bi be'gake'n dill' daa bllebgake' bich wleb fariseoka' legake' gana' chdop chllaggake' choe'lwillgake' Chioza', ⁴³ la' wyoollall'chgake' ina ben' nakgake' ben' wen aga ka daa ina Chioza' nakgake' ben' wen.

Cho'a xtill' Jesúza' nakan dii llialo

⁴⁴ Na'ch wñe Jesúza' zillj chi'e:

—Nottez ben' chonlilall' nad', aga toz' nadaan chonlilallee, san len beena' bsel' nadaan chonlilallee. ⁴⁵ Na' nottezə ben' chle'ile' nad', lekzka' chle'ile' beena' bsel' nad'. ⁴⁶ Zaa yell-lioni

kwenche beena' gonlilallee nad' te' lo beeni' cha'na' na' bich soe' lo yel chola'. ⁴⁷ Na' shi no ben' chenile' cho'a xtillaani na' bi chone' ka nia', aga nadaan wchogloa' che', la' aga zaa kwenche wchogloa' che ben' yell-lionin, san zaa kwenche yislagakee na' bi kwiayi'gake'. ⁴⁸ Beena' bi cheenile' gonlilallee nad' na' bi chzenague' cha', de daa gawan xya che'. Cho'a xtillaana' daa ba bi'a, lennan' gawan xya che' kat' illin lla te che yell-lioni. ⁴⁹ La' dillaa daa ba bi'a aga to bia'lozan' wnia' ka'. Xa'na', beena' bsel' nad', len' nllie' bia' bin chiyal' inia' na' bin chiyal' wli' wsedid' ben'. ⁵⁰ Na' nezid' dill' daa nllia Xa'na' bia' inia' nsa'n yel' mban zejli kan'i. Daan, yog'lol diika' nia', nakan kon ka wna Xa'na' nad'.

13

Wdib Jesúza' ni'a ben'ka' nakgake'ne' txen

¹ Ka ba zoa gal' ln̄i Paskwa', na' nezi Jesúza' ba zoa gao yizee yell-lioni kwenche yiyaje' kwit Xe'na'. Na' chakchgaile' ben'ka' nonlilall'gake'ne' yell-lioni, na' ka' gokile' legake' axt ga zeelo.

² Na' ka chaogake' xshe'na', ba wloolə dii xiwaa loo yichjlall'do' Jud Scariota', xiin̄ Simónna', gone' Jesúza' lo na' ben' malka'. ³ Na' nezi Jesúza' Xe'na' bene' lall' nee yog' dii de, na' nezile' wzee gana' zoa Chioza' na' kwite'na'kzə yilline' dii yobla'. ⁴ Na' lo zej chaogake' xshe'na', wzolla' Jesúza' na' bkwase' xe' dii ton̄a' ka'lə, na' bchele' to lech' lsineena'. ⁵ Na'ch wdee nisa' to loo sha' na' wzoloe' chyibe' ni'a to to ben'ka' nakgake'ne' txen, na' bisbillile'n lechaa nc̄heje' lsineena'.

⁶ Na' ka bidol' chibe' ni'a Simón Pédrona', na'ch che' Pédrona'ne':

—Xan', Ɂali'lə chibzo' ni'ani?

7 Na' che' Jesúza'ne':

—Aga chajniilo' dga chon' naa, per techlə shajniilo'n.

8 Na'ch che' Pédrona'ne':

—Bat wi'a latj chibo' ni'ani.

Na'ch che' Jesúza'ne':

—Shi bi chib' ni'ona', bich gako' nad' txen.

9 Na'ch chize' Pédrona'ne':

—Shi kan' nakan, Xan', aga toz ni'ani chibo' san len yichji na' na'ki.

10 Na'ch che' Jesúza'ne':

—Beena' nosh' nazje', toz ni'enan' chiyal' shech, la' ba nechkz kwerp che'na'. Ka'kzan le', ba nxi nyechle, la'kzi aga yog'le.

11 Daa nezi Jesúza' non gon le' lo na' ben' malka', daan chi'e legake': “Aga yog'le ba nxi nyech.”

12 Na' ka biyoll wdibe' ni'eka', na'ch biyakwe' xe' dii toŋa' na' jachi'e cho'a mesa' sto shii. Na' chi'e legake':

—¿Añezile bi zejin dga ba ben'? 13 Le' nale nad' Maestro na' Xan', na' lekzile, la' kan' nakan. 14 Na' shi nad', naktia' Maestro chele na' Xanle, ba wdib' ni'alena', lekzka' le' chiyal' chib ni'a ljwell-le. 15 Ba ben' dga kwenche bliid' le' kan' chiyal' gon che ljwell-le. 16 Dii li nia' le', aga zak'chi to mos ka xane'na', na' to ben' zej mandad aga zak'che' ka beena' bseleene'. 17 Shi chajniile diiki ba wnia' na' gonlen, na' soale mbalaz.

18 'Na' aga yog'len nia' ka'. Nezid' nolen ba wlej' kwenche nonlilall'le nad'. Na' chiyal' gak ka na Cho'a Xtil' Chioza', gana' na: “Beena' chaolentie' nad' txen ba chiyechje' nad' gone' mal cha'.”

19 Naa nia' le' dga zi' gak, kwenche kat' ba chakan shajle'le nak' beena' ba wnia' nak'. **20** Na' dii li nia' le', beena' wlebe' nottezə beena' wselaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

Wdixjee Jesúza' ka gon Juda' wdie'ne' lo na' ben' malka'
(Mt 26:20-25; Mr. 14:17-21; Lc 22:21-23)

21 Na' biyoll wna Jesúza' ka', le gokyeshii loo yichjlall'do'ena', na' bi'e dill' kwaslol, chi'e:

—Dii li nia' le', tole gonle nad'lo na' ben' malka'.

22 Na'ch ben'ka' nakgake'ne' txen chwia ljjwell-gake' chakgakile' nogaken' chi'e ka'. **23** Na' to beena' nak Jesúza' txen, beena' chakchgaile', chi'e kwite'na'. **24** Na' Simón Pédrona' bene'sen' kwenche inabi beena' chi' kwit Jesúza' noen' chi'e ka'. **25** Na'ch jabig'ch beena' gaoch kwit Jesúza' na' wnable'ne', chi'ene':

—¿Noran gon ka', Xan'?

26 Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleeje' lat' yetxtila' na' bi'en Jud Scariota', xiin beena' le Simón. **27** Na' kon ka biyoll be' Jesúza' Juda' yetxtila', lii wyoote Satanáza' loo yichjlall'do'ena'. Na'ch che' Jesúza'ne':

—Daa ba ngoo yichjo' gono', bentegan.

28 Na' ni to ben'ka' chaolengake'ne' bi wyjni'gakile' biche gollze'ne' ka'. **29** Bale' gokgakile' goll Jesúza' Juda' lljxi'e bi dii chyalljgakile' che xshe' che'ka', wa wi'e lat' mech ben' yesh'ka'. La' len' nak lall' nee xmeche'ka'. **30** Na' ka wde wdao

Juda' yetxtila' daa be' Jesúza'ne', lii wza'tie'. Na' ba gol̄ ka wzee.

Dii koba' daa nllia Chioza' bia'

³¹ Na' ka wde wza' Juda', na'ch che' Jesúza':
 —Ba bllin lla sho'a balaan̄, nad', Ben̄' Bsel' Chioza' Yell-lioni, na' lekzka' dga gon', gonan ka sho' Chioza' balaan̄. ³² Na' daa gon' ka sho' Chioza' balaan̄, lekzka' kwin Chioza' gone' kwenche nad', Ben̄' Bsel' Chioza' Yell-lioni, sho'a balaan̄, na' lii gontie'n. ³³ Le' xiindawaa, zi shlollchga zoalen' le'. Na' yiylle nad', na' chiznia' le' ka gosh' ben̄'ka' chnabia' ben̄' Israelka': Gana' yiayaa, bi gak sa'le. ³⁴ Na' to dii kob chllia' bia' gonle ɳaa: Li gaki ljwell-le. Ka chakid' le', kan' chiyal̄' gaki ljwell-le. ³⁵ Shi gaki ljwell-le, na'ch inəzi yog'lolle ben̄' nakle nad' txen.

Wdixjee Jesúza' bi w̄cheb Pédrona' shi nombi'ene'
(Mt. 26:31-35; Mr. 14:27-31; Lc. 22:31-34)

³⁶ Na'ch Simón Pédrona' wñabile' Jesúza', chi'ene':
 —Xan', ɿgaran yiyojo'?
 Na' che' Jesúza'ne':
 —Aga wak soo gana' yiayaa ɳaa, per wllin lla soo.
³⁷ Na'ch che' Pédrona'ne':
 —Xan', ɿberache bi gak sa'len' li' ɳaa? Ba nchogllallaa guet' ni Ɂho'.
³⁸ Na' Jesúza' chi'ene':
 —ɿAchakilo' ba nchogllalloo gueto' ni Ɂha'? Dii li nia' li', shon shii bi w̄chebo' shi nombi'o nad' ka zi' kwell-lə shikwteza'.

14

Jesúza' nake' neza' chillin kwit Xe' Chioza'

¹ Bi gakshejlall'le. Li gonlilall' Chioza' na' lekzka'
li gonlilall' nad'. ² Lill xlatj Xa'na' dii xen latj de.
 Shel' bi nakan ka', ba wnia' le' ka', shel'ka'. Na'
naa yiaya lljayenshawaa gana' yidzoale. ³ Na' kat'
 ba benshawaan, na'ch yiayed' yidxia' le' kwenčhe
 lenle soale gana' zoa'. ⁴ Na' ba nombia'le neza' daa
 chillin gana' lljazo'a'.

⁵ Na'ch Tomáza' chi'ene':

—Xan', bi nezinto' gan yiyojo'. ¿Nakran gonnto'
 yillelinto' neza'?

⁶ Na' che' Jesúza'ne':

—Nadaan' neza' daa chillin lao Chioza', na'
 chli'a daa nak dii li, na' cho'a ben' yel' mban zejli
 kaní. Aga no yillin kwit Xa'na' shi bi gonlilallee
 nad'. ⁷ Daa ba nombia'le nad', lenkz Xa'nan'
 ba nombia'le. Na' naa ba nombia'lene' na' ba
 ble'ilene'.

⁸ Na'ch che' Felípena'ne':

—Xan', ben ka ile'into' Xo'na' na' xenlall'nto'.

⁹ Na'ch billii Jesúza' xtilleena', chi'e':

—Felipe, ba wlla zoalen' le', zana' bikzan' gom
 bia'yenoo nad'? Beena' ba ble'ile' nad' lekzka' ba
 ble'ile' Xa'na'. ¿Beračhe chnabzo' gon' ka ile'ilene'?
¹⁰ ¿Abi chajli'o zoalen Xa'na' nad' na' nad' zoale
 nee? Diika' nia'le' aga to bia'lozan' chnia'n, san daa
 cheeni kwin Xa'na', beena' zoalene' nad', lennan'
 cho'a dill' na' lennan' chon'. ¹¹ Li shajle' daa nia'
 zoalen Xa'na' nad', na' nad' zoalen' le'. Na' shi
 bi chajle'le dga nia', la'čh' li shajle' cha' ni che
 yel' wakki chle'ile' chon'. ¹² Dii li nia' le', nottez
 ben' chonlilallee nad', gone' ka diika' chon'. Na'
 dii zak'techi gone' aga ka diika' chon', daa yiaya
 kwit Xa'na'. ¹³ Na' gon' bittez daa inqabile Xa'na'

daa nakle nad' txen kwenche sho'e balaan ni cha'.
 14 Nad' gon' bittezə daa inable daa nakle nad' txen.

B̄cheb Jesúza' wselee Espíritu Sántona'

15 'Shi chakile nad', li gon diika' nllia' bia' gonle.
 16 Na' inabid' Xa'na' wselee sto ben' gaklene' le' na' soalene' le' toshiizi. 17 Len' Espíritu Sántona', beena' chli' daa nak dii li. Na' ben' yell-lioki aga wak wlebgake'ne', la' bi chle'gakile'ne' ni bi nombia'gake'ne'. San le', ba nombia'lene' daa zoalene' le' na' soe' loo yichjlall'do'lena'. 18 Aga wikwaan' le' ka bi' wizeb, san wiyedch' soalen' le'. 19 Aga chllach bich ile'i ben' yell-lioni nad', san le' wle'chkzile nad'. Na' daa mban' toshiizi, lekzka' le' toshiizi ibanle. 20 Kat' illin llana' nia' ka', na' gakbe'ile zoalen' Xa'na', na' le' zoalenle nad' na' nad' zoalen' le'. 21 Nottez ben' chzenague' daa nllia' bia' na' chone' ka nan, beenan' chakile' nad'. Na' beena' chakile' nad', lekzka' gaki Xa'na'ne', na' nad' lekzka' gakidee na' gon' kwenche gombia'che' nad'.

22 Na' Júdaza' (beena' sto, aga Jud Scariota,) chi'ene':

—Xan', ¿berache to neto'z gonzo' ka gombia'chnto' li' na' bi len ben' yell-lioki, ben'ka' bi chonlilall'gake' li'?

23 Na' billii Jesúza' xtilleena':

—Beena' chakile' nad', wzoe' xtillaa, na' Xa'na' gakile'ne', na' nad' kon Xa'na' yidsoalennto'ne'.

24 Na' beena' bi chakile' nad', bi chzoe' xtillaa. Na' diika' chli' chsedid' aga dii chyiljlallzaan, san Xa'na', beena' bsel' nad', chzajniile'n nad'.

25 'Yog' diiki choe'len' le' dill' naa shlak ni zoalen' le'. 26 Na' kat' bich soa' len le', Espíritu Sántona',

beena' wsel' Xa'na', gaklene' le' na' wzajniile' le' yog' dii chiyal' inezile, na' gone' ka lljadinile yog' diika' ba wnia' le'.

²⁷ 'Yel' mbalaza' chkwaanlena'n le'. Na' yel' mbalaz cha'na' chon' le' bi nakan ka yel' mbalaz che ben' yell-lioka'. Bi gakshejlall'le, ni bi gall illeble. ²⁸ Ba benkzile nia' yiayaa gana' zoa Xa'na' na' lekzka' wiyedchkz' yidzoalen' le'. Na' shi chakile nad', chiyal' yibaile daa yiayaa gana' zoa Xa'na', la' zak'che' aga ka nad'. ²⁹ Na' ba nia' le' diiki zi' gak kwenche kat' gakan shajle'le.

³⁰ 'Na' bich bitek dill' we'lench' le' naa, la' ba za' dii xiwaa, daa chnabia' yell-lioni. Per aga wak inabia'n nad'. ³¹ La' chor' kon ka nllia Xa'na' bia' gon' kwenche ineziben' yell-lioki chakid' Xa'na'. Li yizolla'. Li yido'.

15

Jesúza' chzaklebi kwine' to yag uva

¹ 'Nad' nak' ka yag uva daa nak dowalj, na' Xa'na' nake' ka beena' chaz chaañan. ² Na' yog'lol xoz' xka'inna' daa bi chbia, chchogue'n. Na' diika' chbia, chonshao'che'n kwenche zizikli kwian. ³ Na' le', nakle ka xoz' xka'inna' daa chbia, daa bzenagle ka nak dill'ka' be'len' le'. ⁴ Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndil nllagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

⁵ 'Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gakle ka xoz' xka'inna' daa chbiachga. Shi le' bi nakle nad' txen aga bi gak

gonle. ⁶ Beena' bi gone' ka dii le gone' nad' txen, nake' ka xoz' xka'inna' daa ba bchogue' na' ibillan, na' yitope'n wzaleen lo yi'na' kwenche sheyan.

⁷ Shi le' soatezi soale gonle nad' txen na' toshiizi chzoale xtillaana', li inab daa cheenile na' gakan. ⁸ Xa'na' cho'e balaan kat' chonle dii wenna', na' daa chonle ka', chli'lwin dii li nakle nad' txen. ⁹ Ka chaki Xa'na' nad', ka'kzan chakid' le'. Li soatezi soa gonle nad' txen kwenche gakbe'ile chakid' le'. ¹⁰ Shi gonle daa nllia' bia' gonle, na'ch gakbe'ile le chakid' le', ka chon' nad', chon' daa nllia Xa'na' bia' gon', na' ka' chakbe'id' le chakile' nad'.

¹¹ Ba wnia' le' ka' kwenche yiba yizaklenile' nad', na' yiyoll yido soale mbalaz. ¹² Na' dgan nllia' bia' gonle: Gaki Ijwell-le ka chakid' le'. ¹³ Bich bi yel' chaki dii xench de ka che beena' chzani yel' mban che'na' guete' ni che ben'ka' nllaguile'. ¹⁴ Len' nakle ben'ka' nllaguid' shi chonle ka nllia' bia' gonle. ¹⁵ Bich gon' le' ka mos, la' beena' nak mos aga nezile' bin chon xane'na'. San nakle ben' nllaguid' la' ba bzajniid' le' yog' diika' wna Xa'na' nad'. ¹⁶ Aga len' wlejle nad', san nadaan wlej' le' na' ba bzoa' le' shajle lljenle dii wenna' daa bi te cheyi. Na' Xa'na' gone' yog' daa inabilene' daa nakle nad' txen. ¹⁷ Na' dgan chllia' bia' gonle: Gaki Ijwell-le ganga.

Ben'ka' bi nombia' Chioza' gakzbangakile' ben'ka' nak Crístona' txen

¹⁸ Bibi gakile shi ben'ka' bi nombia' Chioza' gakzbangakile' le', la' nezkzile ka'kzan gokzban-gakile' nad'. ¹⁹ Shel' nakle legake' txen na'ch gak-gakile' le', shel'ka'. Per daa ba wlej' le' kwenche

gakle nad' txen, daan chakzbangakile' le'. ²⁰ Li lljadini ka ba wniakz' le': "Aga inacho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtillaana', lekzka' wzenaggake' chele. ²¹ Yog' diikin gongakile' le' daa nakle nad' txen, la' bi nombia'gake' Xa'na' beena' bsel' nad'.

²² 'Ben'ka' bi nombia' Chioza', aga bi dol' napgake' shel'ka' bi bidye'len' legake' xtilleena'. Per daa ba bidye'len' legake' xtilleena' bi gak inagake' bi chakbe'gakile' chongake' dii mala'. ²³ Beena' chakzbanile' nad' lenkz Xa'nan' chakzbanile'. ²⁴ Aga bi dol' napgake' shel'ka' bi bli'a yel' wakka' daa konon' gon ladje'ka'. Na' la'kzi ba ble'gakile' diika' chon', bia'kzə chakzbangakile' nad' na' Xa'na'. ²⁵ Chak dga kwenche chillinin ka na ley che'ka' gana' nan: "Kon gokzi' gokzbangakile' nad' la'kzi aga bi ben' chegake'."

²⁶ 'Na' wselaa Espíritu che Xa' Chioza', beena' gaklene' le'. Espírituna', beena' chli' daa nak dii li', see gana' zoa Xa' Chioza' na' yidyee xstillaa. ²⁷ Na' lekzka' lenle we'le cho'a xtillaana', la' ba gokle nad' txen ka wzoloa' chli' chsedid' ben'.

16

¹ 'Ba wnja' le' diiki kwenche bi yidinjile' daa chonlilall'le nad'. ² La' bich wlebgake' le' gana' chdop chllagcho choe'lwillcho Chioza', na' wllin lla axt wit ben' le' daa gakile' kan' chazlall' Chioza'. ³ Gongake' ka' daa bi nombia'gake' Xa'na', ni bi nombia'gake' nad'. ⁴ Na' nia' le' diiki kwenche kat' ba bllin lla ile'ile yel' zak'zi'ka', lljadinile ka'kzan

ba wnia' gak chele. Bi wnia' le' ka' dii nechte daa ni zoalen' le'.

Daa chon Espíritu Sántona'

⁵ 'Na' naa yiayaa lljazoalen' Xa'na' beena' bsel' nad', na' ni stole bich chñabile nad' gan yiayaa. ⁶ Na' daa ba wnia' le' ka' le chakyesh'zi'le'. ⁷ Per dii li nia'le', wakch wen chele shi yiayaa. La' shi bi yiayaa, beena' gaklene' le' bi yidsoalene' le'. San shi ba ziayaa, na' wselaane'. ⁸ Na' kat' yide', gone' kwenche gakbe'i ben' yell-lioki nakgake' ben' saaxyaa daa bi biyombia'gake' beena' nak dowalj ben' li ben' shao', na' gakbe'gakile' chidol'gake' wchoglo Chioza' chegake' ni che xtoleeka'. ⁹ Yiyakbe'gakile' napgake' dol' daa bi chonlilall'gake' nad'. ¹⁰ Na' yiyakbe'gakile' nak' ben' li ben' shao' daa yiayaa gana' zoa Xa'na' na' aga wle'chile nad'. ¹¹ Na' lekzka' yiyakbe'gakile' Chioza' wi'e yel' zak'zi' che ben'ka' bi chzenag cha', la' ba bchogloe' sak'zi' dii xiwaa daa chñabia' yell-lioni.

¹² 'Dii zanch de dii inia' le', dii bi shajniile naa. ¹³ Per kat' ila' Espíritu Sántona', beena' chli' daa nak dii li, len' wzajniile' le' kwaslol daa nak dii li. La' aga dii chiljlall'ze'n ine', san ine' daa che' Xa'na'ne', na' chixje'ile' le' diika' zi' za' gak. ¹⁴ Na' gone' ka sho'a balaanl, la' wzajniile' le' diika' ba wnia'. ¹⁵ La' yog'lolte daa na Xa'na' lennan' cho'a dill'. Daan nia', Espírituna' wzajniile' le' diika' ba wnia'.

Yel' chakyeshiina' yiyakan yel' xaba

¹⁶ 'Aga chllach bich ile'ile nad', na' lekzka' aga wlla yizle'ile nad'.

¹⁷ Na' bal ben'ka' nakgake'ne' txen wñabi ljwelle':

—¿Bera zejin daa ne' aga chllach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'? ¹⁸ ¿Bi zejin daa naze' "aga chllach"? Bi chajniicho biche naze' ka'.

¹⁹ Na' Jesúza' gokbe'ile' cheengakile' inabgakile'ne' bi zejin daa wne', na'ch chi'e legake:

—¿Achnabi ljwell-le bi zejin daa wnia' le' aga chllach bich ile'ile nad', na' lekzka' aga wlla yizle'ile nad'? ²⁰ Dii li nia' le', kwell-le na' gakyeshile shlak ben'ka' bi nombia' Chioza' yibagakile'. Na' la'kzi gakyeshile, yel' chakyeshii chelena' yiyakan yel' xaba. ²¹ Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le chibaile' ba zoa to bi'do' che' yell-lioni. ²² Ka'kzan chak chele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wlon yibaile.

²³ 'Na' kana'chan bich bi inabile nad'. Dii li nia' le', bittezə dii inabile Xa'na', gonkze'n, daa nonlilall'le nad'. ²⁴ Axt naa ni to bibin' inabile Xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

Jesucristona' ba bene' gan daa chñabia' yell-lioni

²⁵ 'Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che Xa'na' ka to shajniilen. ²⁶ Na' kat' ba bllin llana', kanan' inabile Xa'na' bittezə dii inabilene' daa nonlilall'le nad', na' bi chonan byen kwin'inabidee gaklene' le', ²⁷ la' kwinkz Xa'na' chakile' le' daa chakile nad' na' daa chajle'le bselee

nad'. ²⁸ Wzaa gana' zoa Xa'na' kwenche bid' yell-lioni, na' naa yizaa yell-lioni kwenche yiaya gana' zoe'.

²⁹ Na'ch che' ben'ka' nakgake'ne' txen:

—Naach ba choo dill' dii najnii, na' bich bi jempl chchino'. ³⁰ Na' chakbe'into' nez nle'ilo' yog'lolte, na' aga chonan byen no bi inabzi li', la' ba nezlilo' bin inabile' li'. Daan chajle'nto' dii li zoo gana' zoa Chioza'.

³¹ Na' che' Jesúza' legake':

—¿Anaach chajle'le? ³² Ba zoa illin lla, wa ba bllinkz llana', illeshlesle na' gala ikaa twej twejle, na' yikwaanle toz'. Per aga tozan' yigaana', la' zoalenkz Xa'na' nad'. ³³ Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li gondiplall', la' ba ben' gan daa chnabia' yell-lioni.

17

Be'lwill Jesúza' Chioza' che ben'ka' nakgake'ne' txen

¹ Na' ka wde wna Jesúza' diika', na' blis jalawe'na' bwie' yabalə, na' golle':

—Xa, ba bllin gor illagloa' daa llia bia' wtil'. Wloo nad' balaan, nad' nak'xiinq', kwenche lekzka' nad' kwaal li' balaan. ² La' ba beno' lo na' inabia' lao yog'lol ben', kwenche gon' ka gat' yel' mban zejli kani che ben'ka' wlejo' gonlilall'gake' nad'. ³ Na' daa gat' yel' mban zejli kani che ben', zejin nombia'gake' li', nako' dowalj Chios, na' lekzka' nombia'gake' nad', ben' bseloo yell-lioni.

⁴ 'Nad' ba wlo'a li' balaan lao ben' yell-lioki, na' ba biyoll ben' daa bllio' bia' gon'. ⁵ Na' naa, Xa,

yiyongacho' nad' balaanna' kat' yiayed' kwito'na' ka balaanna' daa wdapkz' kana' wzoalen' li' ka zi' xe sil yell-lioni.

6 'Ba beno' nad' benki wlejo' yell-lioni kwenche gonlilall'gake' nad', na' ba bzajniid'legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'. 7 Na' naa ba ñezgakile' yog' dill'ka' bi'a nakan dii wno'. 8 La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li' wzaa gana' zo' na' ba wyajle'gake' lin' bseloo nad'.

9 'Chñabid' li' gakleno' legake'. Aga chñab' gakleno' yog' benk yell-lioki, san chñab' gakleno' benka' wlejo' kwenche gonlilall'gake' nad', la' lall' non' nakgake'. 10 Na' yog' benka' nak lall' na' lekzka' nakgake' lall' no'. Na' legake' ba wloogake' nad' balaan.

11 'Na' naa ba chiza' yell-lioni. Na' legake' yi-gaangake' ni. Xa, li' nako' dowalj benk wen benk shao'. Wdapgach benka' ba beno' nonlilall'gake' nad' kon yel' wak cho'na' kwenche gakgake' toz, ka nakcho cho' nakcho toz. 12 Shlak wzoalen' legake' yell-lioni ba wdap bwia' legake' kon yel' wak cho'na'. Na' ni toe' bi wliayi', letechokzə beena' ba nakan kwiayee, kwenche gak ka na Cho'a Xtilloona'.

13 'Na' naa ba zizaa gana' zo'. Na' nia' li' diiki shlak ni zoa' yell-lioni kwenche benki gapgake' yel' xaba ka daa nap'. 14 Nad' ba bzajniid'legake' cho'a xtilloona', na' benka' bi nombia' li' chakzi' chakzbangakile' legake' daa bi nakgake' legake' txen, ka chon' nad' bi chon' txen benka' bi nombia'

li'. ¹⁵ Aga chñabid' li' yikoo ben'ki nonlilall' li' lo yellioni, san chñab' wkweejgachgako'ne' kwenche ki Ɂhitj seni dii mala' daa chda yell-lioni legake'. ¹⁶ Bi nongake' txen ben'ka' bi nombia' li', ka chon' nad' bi chon' ben'ka' txen. ¹⁷ Bengach kwenche ben'ki nonlilall' nad' gakchgake' ka chazlalloo daa chzenaggake' dill' li Ɂho'na', la' cho'a xtilloona' nakan dii li. ¹⁸ Ka beno' bseloo nad' kwenche bidsoa' yell-lioni, ka'kzan chselaa legake' kwenche shajgake' ladji ben' yell-lioki. ¹⁹ Chzanlallaa kwin' gon' ka no' ni Ɂhegake', kwenche lekzka' gongake' ka no' daa ba chzenaggake' dill' li Ɂho'na'.

²⁰ 'Aga chñabid' li' gakleno' to lezgake', san lekzka' chñab' gakleno' ben'ka' gonlilall' nad' kat' wzenag-gake' cho'a xtillaana' daa we' ben'ki. ²¹ Xa, chñabid' li' gonshgo' ka gak yog'gake' toz, ka nakcho cho' nakcho toz. Lekzka' chñab' gakgake' cho' toz kwenche ben'ka' bi nonlilall' li' shajle'gake' lin' bseloo nad'. ²² Ba wlo'a legake' balaan̄ ka daa wloo nad', kwenche gakgake' toz ka nakcho cho' nakcho toz. ²³ Nad' nakgakee toz ka nakcho cho' nakcho toz. Bengach ka gakgake' toz ka chiyal', kwenche ben'ka' bi nonlilall' li' gakbe'gakile' lin' bseloo nad', na' gakbe'gakile' chakilo' ben'ka' nonlilall' nad' ka chakilo' nad'.

²⁴ 'Xa, li' ba beno' nad' legake', na' cheenid' soalengake' nad' gana' soa' kwenche ile'gakile' balaan̄ cha'na' daa beno' nad' ka zi' xe silte yellioni daa chakilo' nad'. ²⁵ Xa, li' nako' ben' li ben' shao'. La'kzi ben'ka' bi nonlilall' nad' bi nom-bia'gake' li', nad' nombi'a li' na' ben'ki nonlilall' nad' nezgakile' lin' bseloo nad'. ²⁶ Na' ba bzajni'd' legake' non nako', na' zizikli wzajni'chgakidee

kwenche kon ka chakilo' nad' ka'kzə gakgakile'
ben', na' nad' soalenkzgakee.

18

Bex'gake' Jesúza'

(Mt. 26:47-56; Mr. 14:43-50; Lc. 22:47-53)

¹ Na' ka biyoll wna Jesúza' ka', wza'lene' ben'ka' nakgake'ne' txen wyajgake' shlaa yao Cedrónna', na' wyoolene' legake' to yell-lio ga lle' lla' yag olivo.
² Na' Juda', beena' bene' Jesúza' lo na' ben' malka', lekzka' nombi'e latja', la' Jesúza' zan shii wyajlene' legake' na'. ³ Na' bllinlen Juda' ben' zan soldad na' zi xonj ben'ka' chap yoodo'na', ben'ka' bsel' bxozka' chnabia' len fariseoka'. Zejgake' nox'gake' no kandil, no yi' yech, na' dii wniagakile'. ⁴ Na' Jesúza' ba nezkzile' yog' daa zi' gak che', na'ch bcheje' jatile' legake', na' chi'e:

—¿Non chiyilje?

⁵ Na' che'gake'ne':

—Jesús, ben' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' Juda', beena' bene' le' lall' na'gake'.

⁶ Na' ka goll Jesúza': “Nadaan”, to biza'zgake' jayet-gake' wza'che'lə. ⁷ Na'ch wiznabi Jesúza' legake':

—¿Noran chiyilje?

Na' che'gake'ne':

—Jesús, ben' Nazaretan'.

⁸ Na'ch che' Jesúza' legake' sto shii:

—Ba wniakz' le' nadaan. Na' shi nadaan chiyilje, li we' latj yiyyaj ben'ki.

⁹ Golle' legake' ka' kwenche billinin daa wne': "Xa, ba wdap' ben'ka' beñ'o' nad' na' ni toe' bi wlliayi'." ¹⁰ Na' Simón Pédrona' no'e to spad, na'ch wleje'n bchogue' tl̄aa nag to ben' le Malco, de shlina'. Na' Málcona' nake' xmos bxoz choo bxoz xenna'. ¹¹ Na'ch che' Jesúza' Pédrona':

—Bigoo spad cho'na' loo lillinna'. La' chonan byen gak ɬha' daa ba nllia Xa'na' bia' gak.

*Jwa'gake' Jesúza' lao Anáza'
(Mt 26:57-58; Mr. 14:53-54; Lc 22:54)*

¹² Na'ch soldadka' len xane'ka', na' ben'ka' chap yoodo' che ben' Israelka', beñ'gake' Jesúza' na' bçhejgake'ne'. ¹³ Na' zigaate jwa'gake'ne' lao Anáza' xtobiin che Caifáza', na' Caifáza' nake' bxoz choo bxoz xen lo yiza'. ¹⁴ Na' Caifáza', len' beena' golle' ben'ka' chñabia' ben' Israelka' wenchlan wit-gake' toz Jesúza' aga ka daa kwiayi' yog' ben' wlall che'ka'.

*Bi bçheb Pédrona' shi nombi'e Jesúza'
(Mt 26:69-70; Mr. 14:66-68; Lc 22:55-57)*

¹⁵ Na' Simón Pédrona' len sto ben' nake' Jesúza' txen janogake'ne'. Na' beena' zejlen Pédrona' txen nombia' bxoz choo bxoz xenna'ne', daan gok wyoolene' Jesúza' lesh' chyoo che bxoz choo bxoz xenna'. ¹⁶ Na' Pédrona' wzie' cho'a leeja'. Na'ch beena' nombia' bxoz choo bxoz xenna', bicheje' jashaljlene' bi' nool wewaa chap cho'a leeja' kwenche be'b' latj wyoo Pédrona'. ¹⁷ Na'ch bi' nool wewaa chap cho'a leeja' che'b' Pédrona':

—¿Aaga lenon' nako' beeni txen?

Na' che' Pédrona'b':

—Bi len' nakee txen.

18 Na' moska' len ben'ka' chap yoodo'na' wlekgake' yi'na' kwenche wbillgake' daa ba chak zag. Na' jselen Pédrona' legake' cho'a yi'na' kwenche billa'ile'.

Wnabyolli Anáza' Jesúza'

(Mt 26:59-66; Mr. 14:55-64; Lc 22:66-71)

19 Na' beena' nak bxoz choo bxoz xen wñabyollile' Jesúza' no ben'ka' nakgake'ne' txen na' beran chli' chsedile'. **20** Na' che' Jesúza'ne':

—Ladj lkwe' beñaan ba bi'a dill'. Ba bli' bsedid' ben'lesh' chyoodo'na'na' gachla' chdop chllag ben' wlallka' choe'lwillgake' Chioza'. Na' bibi dill' bi'a do ngash'zə. **21** ¿Berače chñabzilo' nad'? Wñabi ben'ka' ba bli' bsedid' kwenche inagake' li' beran ba goshgakee. La' ñezgakile' bin ba bli' bsedid' legake'.

22 Na' ka wde wna Jesúza' ka', to ben'ka' chap yoodo'na' wdape' xagueena', chi'ene':

—¿Biche chilliizo' bxoz choo bxoz xenni dill'?

23 Na' che' Jesúza'ne':

—Shi bi dii mal ba wnia', wnashki beran ba wnia'. Na' shi shlikzan ba wnia', ¿berače chitzo' nad'?

24 Na'ch de ncnejzi Jesúza' bde Anáza'ne' lao Caifáza', beena' nak bxoz choo bxoz xen.

Sto shii bi bcheb Pédrona' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

25 Na' shlak ze Pédrona' chshee cho'a yi'na', ben'ka' lle' na' che'gake'ne':

—¿Aaga lenon' nako' beeni txen?

Na' bi bchebe', san chi'e:

—Bi nakee txen.

²⁶ Na' to xmos bxoz choo bxoz xenna', beena' nak bish' ljwell beena' b_{ch}og Pédrona' nague'na', chi'ene':

—¿Aaga lenon' ble'lenid' Jesúza' gana' lle' yag olívoka'?

²⁷ Na' stokzə bi b_{ch}eb Pédrona', na' lii wchellte shikwteza'.

Bdegake' Jesúza' lao Pilátona'

(Mt. 27:1-2, 11-14; Mr. 15:1-5; Lc. 23:1-5)

²⁸ Na' cheeni'l_{es}do' bichejgake' lill Caifáza' na' b_{ic}he'gake' Jesúza' gana' chon Pilátona' yel' joschisa'. Na' ben' Israelka' aga wyoolengake' Jesúza' gana' chon Pilátona' yel' joschisa', la' aga wak gaogake' daa chsini'agake' che Paskwa' shi ba wyoogake' loo yoona'. ²⁹ Na'ch bchej Pilátona' chi'e legake':

—¿Bi xyan chaole che beeni?

³⁰ Na' che'gake'ne':

—Shel' bibi dii mal chone' aga widwa'nto'ne' lawo' ni, shel'ka'.

³¹ Na'ch che' Pilátona' legake':

—Li yichi'e na' li gon yel' joschis che' kon ka na ley chelena'.

Na' ben'ka' chnabia' ben' Israelka' che'gake'ne':

—Aga bi lsens chento' de witnto' ben'.

³² Na' daa gok ka', billinin ka wna Jesúza' gak kat'ka' guete'. ³³ Na'ch biyoo Pilátona' gana' chone' yel' joschisa', na' goxe' Jesúza' chi'ene':

—¿Alin' nako' ben' w_nabia' che ben' Israelki?

³⁴ Na' che' Jesúza'ne':

—¿Adii chza'z balloon no' ka'? ¿Awa ben' yoblan ba be'lene' li' xtillaana'?

³⁵ Na'ch che' Pilátona'ne':

—¿Achakilo' ben' Israel nad'? Ben' wlall cho'kikzan na' bxozka' chñabia' le', ba bengake' li' lo na'. ¿Beran beno'?

³⁶ Na'ch che' Jesúza'ne':

—Aga nak yel' wñabia' cha'na' ka che ben' yell-lioki. Shel' nakan ka', ben'ka' nak nad' txen wllongake' nad' kwenche bi gox' ben' wlall cha'ki nad', shel'ka'. Per aga nak yel' wñabia' cha'na' de yell-liz.

³⁷ Na'ch che' Pilátona'ne':

—¿Ana' ben' wñabia'kzan nako', shka'?

Na' che' Jesúza'ne':

—Awe, kan' nakan. Ni cheyi daan golj' na' bid' yell-lioni, kwenche wi'a dill' daa nak dii li. Na' yog'lol ben'ka' chzenaggake' dill' lina', chzenaggake' cha'.

³⁸ Na'ch che' Pilátona'ne':

—¿Beran nak dill' li?

Bchoglogake' guet Jesúza'

(Mt. 27:15-31; Mr. 15:6-20; Lc. 23:13-25)

Na' ka wde goll Pilátona'ne' ka', na'ch bizcheje' kwenche jashaljlene' ben' wñabia' che ben' Israelka', na' chi'e legake':

—Ni to dii mal bi chillelid' chon beeni. ³⁹ Na' kon ka yoolole chak yog' yiz chsan' to ben' de lillyana' kat' chal' lní Paskwi, ¿abi cheenile yisan' ben' wñabia' cheleni, le' nakle ben' Israel?

⁴⁰ Na'ch yog'gake' besyaagake' zillj, che'gake'ne':

—¡Aga beenan' yisano'! ¡Barrabázan' bisa!

Na' Barrabáza' nake' to ben' wban.

19

¹ Na' ka' gok ben Pilátona' mandad bet wdin-gake' Jesúza'. ² Na' soldadka' bengake' to bxoon

de xis yesh' na' bllingake'n yichje'na' ka corona
na' bwakwgake'ne' to lech' de morad. ³ Na'ch
wbig'gake' lawe'na' chtitjgakile'ne', chongake' ka
ben' chgoo le' balaan, che'gake':

—¡Toshiizi sechgayi che beeni chñabia' ben' Israelka'!

Na' wdapgake' xagueena'.

⁴ Na'ch bizchej Pilátona', chi'e ben' Israelka':

—Li wwia, ni kwejee kwenche inezile ni to dii
mal bi chillelid' bene'.

⁵ Na' bchej Jesúza' mbinte bxoon^q de xis yeshaa
yichje'na' na' nakwtie' lech' morada'. Na'ch che'
Pilátona' legake':

—Ni ze beeni chaole xya cheyin.

⁶ Na' bxozka' chñabia' na' ben'ka' chap yoodo'na'
ka ble'gakile'ne', na'ch wzologake' chosyaagake'
zillj, che'gake':

—¡Bdee lee yag cruza'! ¡Bdee lee yag cruza'!

Na' che' Pilátona' legake':

—Li yichi'e, shka'. Na' li wdee, le'. La' nad', ni to
dii mal bi chillelid' bene'.

⁷ Na' ben' wñabia' che ben' Israelka' che'gake'ne':

—De to ley chento' daa na chiyal' guete' daa
nalze' nake' Xiiñ Chios.

⁸ Na' ka gollgake' Pilátona' ka', zizikchli bllube'.

⁹ Na'ch biyo'e sto shii gana' chone' yel' joschisa' na'
chi'e Jesúza':

—¿Gara ben' li'?

Na' Jesúza' bikzə bi dill' billi'e.

¹⁰ Na'ch che' Pilátona'ne':

—¿Berache ki chilli'o xtilpii? ¿Abi nezilo' nap' yel'
wñabia' kwenche wdaa li' lee yag cruza' na' naptia'
yel' wñabia' kwenche yisan' li'?

11 Na'ch che' Jesúza'ne':

—Aga bi yel' wñabia' napo' bi gonilo' nad' shel' bi non Chioza'n li'. Daan, beena' bdie' nad' lawo' ni, dol' xench nepe' aga ka li'.

12 Na'ch ka beni Pilátona' wne' ka', biyiljlallee naklə ka gone' kwenche yisane' Jesúza', per ben'ka' chñabia' ben' Israelka' axt chosyaayigake', che'gake'ne':

—Shi yisano'ne' bi nako' txen Césara', la' nottez beena' ina nake' ben' wñabia', Césaran' chizoshyi'e.

13 Na' ka beni Pilátona' gollgake'ne' ka', bizcheje' nchi'e Jesúza'. Na'ch jchi'e gana' chone' yel' joschisa', gana' le Gábata de dill' hebreo, na' zedin latj ga ntaogake' yaj. **14** Na' gok dga llana' chsini'agake' che Iní Paskwa'. Na' ka do gobill goll Pilátona' ben' Israelka':

—Ni ze ben' wñabia' cheleni.

15 Na'ch legake' chosyaagake'. Zeyidgake', che'gake':

—¡Wdoyo beena'! ¡Bdee lee yag crusa'!

Na'ch che' Pilátona' legake':

—¿Acheenile wi'a lsens wda'gake' ben' wñabia' cheleni lee yag crusa'?

Na' bñozka' chñabia' che'gake'ne':

—Toz Césaran' chñabi'e neto'. Koch no ben' yobla zoa.

16 Na'ch Pilátona' bene' Jesúza' lo na'gake' kwenche wda'gake'ne' lee yag crusa', na'ch bñche'gake'ne'.

Bda'gake' Jesúza' lee yag crusa'

(Mt 27:32-44; Mr. 15:21-32; Lc 23:26-43)

17 Na'ch bwa'gake' Jesúza' yag cruz che'na', na' bñche'gake'ne' gana' le Gólgota de dill' hebreo, na'

zejin Latj che llit yichj ben' wet. ¹⁸ Na' na' bda'gake' Jesúza' lee yag cruza', na' lekzka' bda'gake' zi twej ben' shlaa wej. ¹⁹ Na' Pilátona' bzeje' to dii bda'gake' yichj yag cruz che Jesúza', na' nan ki: "Jesús, ben' Nazaret, ben' wñabia' che ben' Israelka'." ²⁰ Na' bzeje'n dill' hebreo, dill' latín na' dill' griego. Na' zan ben' Israelka' blabgake' daa da' yichj yag cruza', la' gana' bda'gake' Jesúza' lee yag cruza' chgaanan gaozə yell Jerusalénnna'. ²¹ Daan bxozka' chñabia' ben' Israelka' gollgake' Pilátona':

—Bi chiyal' inan "Ben' wñabia' che ben' Israelka"; san inan "Beenin nalze' nake' ben' wñabia' che ben' Israelka'."

²² Na' Pilátona' chi'e legake':

—Kon ka ba bzeja'n, ka'kzan igaanan.

²³ Na' biyoll bda' soldadka' Jesúza' lee yag cruza', na'ch bex'gake' xe'na' na' bengake'n taplə kwenche bikaa twej chegake'. Na' lekzka' bex'gake' xe' dii tonə' daa nak to shwilizə. ²⁴ Na' che' ljwellgake':

—Bi wxoxjchon, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtil' Chioza' gana' na: "Bilaagake' xa'na', na' bengake' to wyitj kwenche got'bia' nogake' wkaan."

²⁵ Na' kwit yag cruz che Jesúza' ze xneena' len ben' bile'na', na'len María, xool Cleófaza', na' María ben' yell Magdálana'. ²⁶ Na' ka ble'i Jesúza' xneena', na' lekzka' ble'ile' gaozə ze to beena' nake'ne' txen, beena' le chakile', na'ch chi'e xneena':

—Beenin yiyyoni xiino' naa.

²⁷ Na'ch chi'e beena' nake'ne' txen:

—Beenin yiyoni x_noo n_{aa}.

Na' lo llana' bichi'e x_na' Jesúza' wzoe' lille'na'.

Wit Jesúza'

(Mt. 27:45-56; Mr. 15:33-41; Lc. 23:44-49)

²⁸ Na' ka wde, nezi Jesúza' ba gok yog' daa llia bia' gakə, na' kwenche yillinin ka na Cho'a Xtil' Chioza', wne':

—Chbilid'.

²⁹ Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis* kwenche bzoagake'n cho'ena'. ³⁰ Na' wde weej Jesúza' daa nak zichj zla', na'ch wne':

—Ba gok yog' daa llia bia' gak n_{aa}.

Na' bchek' yichje'na', na' wite'.

To soldad wllibe' to ya dii nla' lawinna' kwit lee Jesúza'

³¹ Na' ben'ka' chnabia' ben' Israelka' bi goon-gakile' yigaan_q kwerp che ben'ka' lee yag cruzka' llana' chombaangake'. Daan gollgake' Pilátona' gone' mandad lljtishjgake' ni'a ben'ka' da' lee yag crusa' kwenche yob guetgake' na' yiletjgake' kwerp che'ka' lee yag cruzka'. ³² Na'ch bselee soldad che'ka', na' jtishjgake' chop laate ni'a ben' necha' da' kwit Jesúza', na' lekzka' bengake' che beena' sto da' zi shlaa kwite'na'. ³³ Na' ka jabig'gake' gana' da' Jesúza' ble'gakile' ba wite', na' bi wdishjgake' ni'ena'.

³⁴ Na' to soldada' wllibe' to ya lo tosh' kwit li'ena' na' lii bchejten chen len nis. ³⁵ Na' beena' choe'

* **19:29** To lo xis: literalmente en una rama de hisopo.

dill' cheyi diiki, len' ble'ile' ka gok, na' cho'e dill' kwenche lenle shajle'le. Na' le' nezile' dill' lin cho'e.
 36 Gok diiki kwenche billinin ka na Cho'a Xtil' Chioza' gana' na: "Ni to llitka' yo'e bi chishjgake'."
 37 Na' gan yoblə lee Cho'a Xtil' Chioza' chiznan: "Wwiagake' beena' wllibgake' yana'."

Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

38 Na' ka wde gok diiki, José ben' yell Arimatéana', wñabile' Pilátona' wi'e latj yikee kwerp che Jesúza'. Joséna' goke' txen Jesúza' do ngash'zə daa bblebe' ben'ka' chñabia' ben' Israelka'. Na' Pilátona' bi'e latj, na'ch wyaj Joséna' bikee kwerp che Jesúza'. 39 Na' wyajlene' Nicodémona', beena' wyaj jawia Jesúza' wal-lə. Na' no'e ka do shichoa kil dii chla' zix daa nongake' de mirra na' nchixan daa le áloe. 40 Na'ch btobgake' kwerp che Jesúza' to lech' ton na' blña'gake'n daa chla' zix, kon ka chon ben' Israelka' kat' chkwash'gake' to ben' wet. 41 Na' gaozə gana' bda'gake' Jesúza' lee yag crusa' de to latj ga nazgake' yag dii chbia dii zix, na' na' zoa to blej kob dii bin' koogake' ni tlish' ben' wet. 42 Na' daa chakbyengakile' wsini'agake' che llana' chombaangake', lii wlootegake' kwerp che Jesúza' loo bleja' zoa gaozə na'.

20

Bib'an Jesúza' ladj ben' wetka'

(Mt. 28:1-10; Mr. 16:1-8; Lc. 24:1-12)

1 Na' lla nech che xmanna', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'. 2 Na'ch bizee ziyajdoe'

gana' zoa Simón Pédrona' na' sto beena' nak Jesúza'
txen, beena' le gokile', jayelle' legake':

—Ba jalejgake' Xanchona' loo bana' na' bi
nezinto' galə jaloogake'ne'.

³ Na'ch wza' Pédrona' len beena' sto zejgake'
cho'a bana'. ⁴ Choptie' zejdogake', per beena' to
bxonjche' aga ka Pédrona' na' zigaate le' blline'
cho'a bana'. ⁵ Na' bchekee bwie' loo bana' na'
ble'ile' lech'ka' chi' na', per bi wyo'e. ⁶ Na' ka
bllin Simón Pédrona' na' wyo'e loo bana' na' lekzka'
ble'ile' lech'ka' chi' na'. ⁷ Na' lecha' bdob yichje'na'
aga lenan chi' kwit lech'ka', san ndoban chi'n ka'lə.
⁸ Na'ch lekzka' wyoo beena' bllin dii nech cho'a
bana', na' ka ble'ile' diika' na' wyajli'e dii li biban
Jesúzan'. ⁹ La' kana' aga ba wyajni'yen'gakile' Cho'a
Xtill' Chioza' gana' cho'en dill' yiban Jesúza' ladj
ben' wetka'. ¹⁰ Na'ch ben'ka' chop non Jesúza' txen
biyajgake' gana' zoagake'.

*Jali'lao Jesúza' María, ben'yell Magdálana'
(Mr. 16:9-11)*

¹¹ Na' Mariana' bigaañe' cho'a bana' chbelle'. Na'
lo zej chbelle' bchekee kwenche bwie' loo bana'.
¹² Na' ble'ile' chop anjl zoagake' do xtil, chi'gake'
loo bana', toe' chi' yichjinna' na' stoe' chi' xni'alin
gana' got' kwerp che Jesúza'. ¹³ Na'ch che'gake'
Mariana':

—¿Berache chbellzo', noolə?

Na' golle' legake':

—Chbell' daa ba bidlejgake' kwerp che Xan'na',
na' bi nezid' galə jaloogake'ne'.

14 Shintg wne' ka', ka bllii jalawe'na' na' ble'ile' ze Jesúza' kolleena', per bi biyombi'e shi Jesúzan'.

15 Na'ch che' Jesúza'ne':

—¿Berače chbellzo', noolə? ¿Nodaa chiyiljo?

Na' Mariána' chakile' beena' chap yag zixkan', na' chi'ene':

—Ben^{do}', shi ba bibejo'ne', wnagach nad' galə jadixjo'ne' kwenche yichi'ane'.

16 Na'ch che' Jesúza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejin: ben^l chli' chsedi ben^l.

17 Na' che' Jesúza'ne':

—Bi goxoo nad', la' bin^l yiyp' kwit Xa'na'. Lete biyaj, Jane ben^l'ka' nak nad' txen jayellgake' ba ziyyaa kwit Xa'na', beena' lekzka' nak Xale. Llazaoalen' Chios cha'na', beena' lekzka' nak Chios chele.

18 Na'ch biza' María, ben^l yell Magdálana', jayelle' ben^l'ka' nak Jesúza' txen nan ba ble'ile' Xancho Jesúza'. Na' golle' legake' diika' goll Jesúza' le'.

Jali'lao Jesúza' ben^l'ka' nakgake'ne' txen

(Mt 28:16-20; Mr. 16:14-18; Lc 24:36-49)

19 Na' ka gol lo llana' bibane', lla nech che xmanna', ba ndop nllag ben^l'ka' nak Jesúza' txen na' nsejtegake' yoona' daa chllebgake' ben^l'ka' chnabia' ben^l Israelka', ka gokbe'gakile' ba ze Jesúza' ladje'ka', na' chi'e legake':

—Soashgale mbalaz.

20 Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' ben^l'ka'

nakgake'ne' txen le bibagakile' ble'gakile'ne'.

21 Na'ch wize' Jesúza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' llje'le cho'a xtillaana' yell-lioni.

22 Na' ka wde golle' legake' ka', na'ch blobe' legake', na' chi'e:

—Li ikaa Espíritu Sántona'. 23 Na' ben'ka' yizi'xenle saaxyä che'ka', wiyakxenan. Na' ben'ka' bi yizi'xenle cheyin, bi yiayakxen chegake'.

Tomáza' bi wyajli'e shi biban Jesúza' ladj ben' wetka'

24 Tomáza', beena' che'gake' Dídimo nake' txen ben'ka' shillin, na' bi lene' ka jali'lao Jesúza' legake'.

25 Na' che'gake'ne':

—Ba ble'into' Xanchona'.

Na' Tomáza' chi'e legake':

—Shi bi ile'id' neena' na' wde xben'ni gana' wde klabka', na' wde na'ni kwit li'ena', aga wyajli'a.

26 Na' ka wde xon' lla, dii yoblə bidop ben'ka' nongake' Jesúza' txen loo yoona' na' len Tomáza'. Na' la'kzi nsejtegake' yoona', wyoo Jesúza' jsie' ladje'ka'. Na' chi'e legake':

—Soashgale mbalaz.

27 Na'ch chi'e Tomáza':

—Bwia na'ni, na' bne'n xbeno'na'; na' bne' noona' kwit li'ani. Bi gakchoplalloo, san wyajle'.

28 Na'ch che' Tomáza'ne':

—Lin' nako' Xan' na' naktio' Chios cha'!

29 Na' che' Jesúza'ne':

—Galj ble'ilo' nad' na'ch chajli'o. Chakomba ben'ka' chajle'gake' la'kzi bin' ile'gakile' nad'.

Bzej Juanna' libri kwenche shajle' ben' Jesúza' nake' Xiin Chios

³⁰ Zan yel' wak daa ben Jesúza' lao ben'ka' nakgake'ne' txen bi nyojgakan lee libri. ³¹ Per diiki nyojgakan kwenche shajle'le Jesúza' nake' Xiin Chioza' na' len' Crítona', beena' wleje' inabi'e, na' daa gon'lilall'lene' gat' yel' mban chele dii bi te cheyin.

21

Jali'lao Jesúza' ben'ka' nakgake'ne' txen

¹ Ka wde, Jesúza' jali'lawe' sto shii ben'ka' nakgake'ne' txen cho'a Nisdo' che Galileana' daa lekzka' le Nisdo' che Tiberias. Na' ki gok: ² Simón Pédrona' len Tomáza', beena' nsi'gake' Dídimo, na' Natanaela', ben' yell Canána' daa llia gana' mban Galileana', na' chopte xiin Zebedewa' na' zi chop ben'ka' nongake' Jesúza' txen lle'gake' Galileana'.

³ Na' Simón Pédrona' chi'e legake':

—Sha'ch' lljxen' bela'.

Na' legake' gollgake'ne':

—Lekzka' wza'lennto' li'.

Na'ch wyoogake' to loo barkw zejgake' wxen bela', na' ni tlish' kono wxengake' do yel. ⁴ Na' cheeni'lesdo' bllin Jesúza' cho'a nisdo'na', na' ben'ka' nakgake'ne' txen aga chakbe'gakile' shi len'. ⁵ Na'ch Jesúza' wñie' legake', chi'e:

—Le' ben' bish'dawaa, ¿abin' senle bela' gaocho?

Na' che'gake'ne':

—Aga no de.

⁶ Na'ch che' Jesúza' legake':

—Li wzal' yixj chelena' shlaa de shli che barkwa' na' idol'gakb.

Na' bengake' ka golle', na' ka nan yigoyogake' yixja' loo nisa' aga chizogakile'n daa nyichachgan belka'. ⁷ Na' beena' le chaki Jesúza'ne', golle' Pédrona':

—Xanchonan'!

Na' kon ka beni Pédrona' golle'ne' ka', lii biyakwte xe'na', na' bxitee loo nisa'. ⁸ Na' ben'ka' sto biyajlengake' barkwa' cho'a nisdo'na'lə, zingoyon yixja' daa zinyichachga belka', la' aga nakchan zit', ka sto guiyoa metrzan. ⁹ Na' ka bichejgake' loo barkwa', ble'gakile' ba chi' yi'na' xna na' xoa to bel lawinna', na' dete yetxtil. ¹⁰ Na' che' Jesúza' legake':

—Li yiyox'to belka' zi' wxenle.

¹¹ Na'ch wyoo Simón Pédrona' loo barkwa' kwenche jaselle' yixj bela' na' bigoyoe'n axt cho'a nisdo'na'. Na' la'kzi tolla'cha nak yixja' daa ziyoon to guiyoa shiin_{ij}yon bel yelka', bi bcheza'n. ¹² Na'ch che' Jesúza' legake':

—Li da gaole xsila'.

Na' ni to ben'ka' nakgake'ne' txen bi biyaxj-gakile' ye'gake'ne': “¿Nora li?” La' gokbe'gakile' Xancho Jesúza'kzan'. ¹³ Na'ch wbig' Jesúza' na' be_{ex}ee yetxtila' len bela' na' bi'e che chegake'.

¹⁴ Na' dga gok de wyon shii jali'lao Jesúza' ben'ka' nakgake'ne' txen ka wde bibane' ladj ben' wetka'.

Bshaljen Jesúza' Simón Pédrona'

¹⁵ Na' ka bidaogake' xsila', na'ch che' Jesúza' Simón Pédrona':

—Simón, xiin Jonás, ¿achakchilo' nad' aga ka to chaki ben'ki nad'?

Na' Pédrona' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'.

¹⁶ Na' de wchop shii wiznabile'ne', chi'ene':

—Simón, xiin Jonás, ¿achakilo' nad'?

Na' Pédrona' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil' cha'.

¹⁷ Na' de wyon shii wiznabile'ne', chi'ene':

—Simón, xiin Jonás, ¿ana' chakilo' nad'?

Na' gokyeshii Pédrona' daa ba gok shoñ shii chñab Jesúza' shi chakile'ne', na' chi'ene':

—Xan', nez nle'ilō' yog'olte, na' nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'. ¹⁸ Dii li nia' li', ka goko' ben' wew', gokw xalaano' to kwinzo' na' wyajo' kon ga wnan cho'. Per kat' ba goxoo, wli nooka' na' yiawkw ben' yobla xalaano'na', na' wchi'e li' ga bi cheenilo' shajo'.

¹⁹ Na' daa goll Jesúza'ne' ka', bzajniile' legake' ka guet Pédrona', na' daa guete' ka' sho' Chioza' balaan. Na' ka wde golle' Pédrona' ka', chi'ene':

—Btiplalloo benlilall' nad' toshiizi.

Beena' le chaki Jesúza'ne'

²⁰ Na' biyechj Pédrona' na' ble'ile' beena' sto, beena' le chaki Jesúza'ne', noe' legake'. Len' wchi'e kwit Jesúza' kana' zeelo wdaogake' xshe'na' kana' wñabile'ne', chi'ene': “Xan', norakznton' gon li' lo

na' ben' malka'?" ²¹ Na' ka ble'i Pédrona'ne', na'ch chi'e Jesúza':

—Xan', ¿shera beeni?

²² Na' che' Jesúza'ne':

—Shi cheenid', ni mbankz beeni kat' yiyyed'. Bi sio' beena' wneyi. Lin' btiplalloo benlilall' nad' toshiizi.

²³ Na' daa golle' ka', wze dill' ladž ben'ka' chonlilall' Jesúza' nan aga wet beena'. Per bi goll Jesúza' Pédrona' bi guet beena', san chi'ene': "Shi cheenid', ni mbankze' kat' yiyyed'. Bi sio' beena' wneyi."

²⁴ Na' beena' nake' Jesúza' txen, beena' le chakile', cho'e dill' kon ka gokə na' bzeje'n lee libri. Na' nezinto' dilla cho'e nakan dii li.

²⁵ Dii zanch dii ben Jesúza' na' bi nyojan. Shel' nyoj yog' diika' bene', chakid' bi gaki yell-lioni ikwa' librka' shel'ka'.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

**PDF generated using Haiola and XeLaTeX on 11 Nov 2022 from source files
dated 29 Jan 2022
f98bf0c8-4467-559d-82ab-96644a44d38f**